



河 源 記

潘 昂 霄 撰

編主五雲王

編初成集書叢

種二他其及記源河

中華民國二十五年十二月初版

張

發行人

王

上海河南路

雲五

印刷所

商

上海河南路

務印書館

發行所

商

上海及各埠

務印書館

河源記

元 潘昂霄撰

延祐乙卯春。聖天子以四海萬國之廣。軫念庶民艱虞。罔控告也。分使詣外郡諸道。布揚德心。咸休興替之。清洿揚激之。畿甸密邇。獨不得均其澤。越五月。詔前翰林學士承旨。閻闕出。翰林侍讀。臣昂霄奉使宣撫京畿西道。臣昂霄承命。驚悸罔措。惟務罄竭忠赤。盡民瘼。後已。闕公一日語昂霄。余嘗從余兄榮祿公都實。抵西國窮河源耳。之不覺瞿然以駭。有是乎哉。請畢其語。公曰。世祖皇帝至元十七年。歲在庚辰。欽承聖諭。黃河之入中國。夏后氏導之。知自積石矣。漢唐所不能悉其源。今爲吾地。朕欲極其源之所出。營一城。俾番賈互市。規置航傳。凡物貢水行。達京師。古無有也。朕爲之。以永後來無窮利益。蓋難其人。都實。汝舊人。且習諸國語。往圖。汝諧。授招討使。佩金虎符以行。是歲四月。至河州。州東六十里有甯河驛。驛西南五六十里。山曰殺馬關。林麓穹隘。譯言泰石答班。啓足寢高。一日程至巔。西邁愈高。四閱月。約四五千里。始抵河源。冬還。圖城傳位置以聞。上悅。往營之。授土蕃等處都元帥。仍金虎符。置寮察督工。工師悉資內地。造航爲艘六十。城傳措工物完。闕闕出驛。聞適相哥征昆哥。賊不迺。力阻遂止。翌歲。兄都實旋都。河源在土蕃朶甘思西鄙。有泉百餘泓。或泉或潦。水沮洳散渙。方可七八十里。且泥淖溺。不勝人跡。逼觀弗克。旁履高山下。眎燦若列星。以故名火敦惱兒。火敦譯言星宿也。羣流奔湊。近五七里。匯二巨澤。名阿

刺腦兒自西徂東連屬吞噬廣輪馬行一日程迤邐東鶩成川號赤賓河二三日程水西南來合赤賓三四日程南來名忽蘭又水東南來名也里尤合流入赤賓具流寢大始名黃河然水又一二日岐裂八九股名也孫幹論譯言九度通廣六七里馬亦可度又四五日程水渾濁土乘馬過之民聚落糾木榦象舟傳毛革以濟僅容兩人繼是兩山峽東廣可一里二里或半里朶甘思東北鄙有大雪山名亦耳麻不莫刺其山最高譯言騰乞里培卽崑崙也山腹至頂皆消土人言遠年成冰時六月見之自八九股水至崑崙行二十日程河行崑崙南半日程地又至地名闊卽及闊提二地相屬又三日程地名哈刺別里赤兒四達之衝也多寇盜有官兵鎮西人簡少多處山南山皆不穹峻水亦散漫獸有髦牛野馬狼狽獐羊之類其東山益高地亦隘有狐可一躍越之者行五六日程有水西南來名納鄰哈刺譯言細黃河也又兩日程水南馬出二水合流入河河北行轉西至崑崙北二日程地水過之北流少東又北流約行半月程地名必赤里始有州事官府州隸河州置司土蕃等處宣慰司所轄又四五日程至積石州卽五日程至河州安鄉關一日程至打羅坑東北行一日程洮河水南來入河又一日程至蘭州卜渡至鳴沙州過應吉里州正東行至甯夏府南東行卽東勝州隸西京大同路地面自發源北澗溪細流旁貫莫知紀極山皆草山石山至積石方林木暢茂世言河九折彼地有二折蓋及貴德州必赤里也漢張騫使絕域羈聯拘執艱厄百罹歷大宛月氏等數國其旁大國五六

以爲窮河源。烏能覩所謂河源哉。史稱河有兩源。一出于闐。一出葱嶺。于闐水北行。出葱嶺河。注蒲類海。不流。洑至臨洮出焉。今洮水自南來。非蒲類明矣。詢之土人。言于闐葱嶺水俱下流。散之沙磧。又有言河與天河通。尋源得織女支機石以歸。亦妄也。崑崙至嵩高五萬里。閩風元圃。積瑤華蓋。仙人所居。又何耶。唐史土蕃傳。河上流由河洪濟梁南二千里。水益狹。春可涉。秋夏乃勝舟。其南二百里。三山中高而四下。曰紫山。古所謂崑崙。其言頗類。然止稱河源。其閒云。國家敝天威。亘天所覆。無閒海內外。冠帶萬國。罔非臣妾。視漢唐爲不足訝。故窮河源。去萬里。若步閩。噫。盛典也。不可不志。因志之。都實族女真蒲察氏。統烏思臧路暨招討都元帥。凡三至土蕃。闕闕出。今除甘肅行省參知政事。是歲八月初吉。翰林侍讀學士中奉大夫知制誥同修國史臣潘昂霄謹述。

河源有志。自本朝始。前乎此。曷爲未有。志河源者。道路遼阻。所傳聞異辭。莫能究河之源也。山經曰。敦薨之水。西流注于泐澤。出于崑崙之東北陬。實惟河源。而水經載河出崑崙。經十餘國。乃至泐澤。經山。又稱陽紆之山。河出其中。凌門之山。河出其中。穆天子傳。亦云陽紆之山。河伯馮夷所居。是惟河宗氏。釋氏西域志。稱阿耨達大山。上有大淵水。卽崑崙山也。地里志。亦稱崑崙山在臨羌西。而漢書載出兩源。或稱有。或稱無。而河源所著異同。況世殊代易。名地亦異。終莫能有究之者。我太祖皇帝二十有一年。春正月。征西夏。夏取甘肅等城。秋。取西涼府。遂過沙陀。至黃河九渡。按崑崙當九渡下流。則崑崙固已歸我職方氏矣。憲宗皇帝二年。命皇太弟旭烈帥諸部軍征西域。凡六年。闢封疆四萬里。于是河源

及所注枝出者盡在封域之內。當時在行有能記其說。皆得于目擊。非放也。逮世祖皇帝功成治定。天下殷富。遂命臣都實置郡河源。故翰林侍讀學士潘公得究其詳實。搜源析派而作斯志。乃知更崑崙行一月。始窮河源。於戲。當四海混一之盛。聞廣見覈。致數千載莫能究者。俾後世有攷而傳信焉。豈斯文之光。實邦家無疆之休也。公之子翊。能不墜其先業。增光而潤色之。至順閒。以同知嘉定州事。來吳。將刊是書行于世。屬九思爲之敘云。元統元年冬十有一月日南至。奎章閣學士院鑑書博士文林郎柯九思書。



今 水 經

黃 宗 羲 學

本館據知不足齋
叢書本排印初編
各叢書僅有此本

今水經序

古者儒墨諸家其所著書大者以治天下小者以爲民用蓋未有空言無事實者也後世流爲詞章之學始脩飾字句流連光景高文巨冊徒充汗惑之聲而已由是而讀古人之書亦不究其原委割裂以爲詞章之用作者之意如彼讀者之意如是其傳者非其所以傳者也先王體國經野凡封內之山川其離合向背延袤道里莫不講求水經之作亦禹貢之遺意也鄺善長注之補其所未備可謂有功於是書矣然開章河水二字注以數千言援引釋氏無稽於事實何當已失作者之意余越人也以越水證之以曹娥江爲浦陽江以姚江爲大江之奇分若水出山陰縣具區在餘姚縣沔水至餘姚入海皆錯誤之大者以是而概百三十有七水能必其不似與歐陽原功謂郭璞作經鄺善長作注璞南人善長北人當時南北分裂故聞見有所不逮余以爲不然璞旣南人而習南水矣其南水又不應錯誤至此後之爲水經之學者蔡正甫補正水經惜不獲見朱鬱儀水經注箋毛舉一二傳寫之誤無所發明馮開之以經傳相淆閒用朱墨勾乙未曾卒業若鍾伯敬水經注鈔所謂割裂以爲詞章之用者也余讀水經注參考之以諸圖志多不相合是書不異汲冢斷簡空言而無事實其所以作者之意豈如是哉乃不襲前作條貫諸水名之曰今水經窮源按脈庶免空言然今世讀書者大抵鍾伯敬其人則簡樸之誚有所不辭爾甲辰除夕

今水經序

雙瀑院長黃宗羲書

今水經表

北水。

河入海。

忽蘭水入河。

亦八思河入河。

納鄰哈刺河入河。

乞里出河入河。

鵬穆河入河。

遼水入河。

鳳林河入河。

浩慶河入河。湟水入浩慶河。

洮水入河。

金水入河。

吃那河入河。奢延水入吃那河。

延水入河。

汾入河。涑入河。

渭入河。漳、清、汧、涇、沮入渭。馬蓮河入涇。漆入沮。

洛入河。澗、灋、伊入洛。

濟入河。汶入濟。

沁入河。

汴入河。須、鄭入汴。京入鄭。索入京。

遼入海。

大清河、小清河、珠子河、渾河、太子河入遼。

鴨綠江入海。

大蟲江入鴨綠江。

混同江入海。

松花江入混同江。黑龍江入松花江。

大凌河入海

小凌河入海。

膠入海。

鹵水、張奴水入膠。

濰入海。

丹入海。

沽入海。

墨入海。

淄入海。

純、時入淄。

濼入海。

漆入濼。

白入海。

黃花鎮川河入白。
潮河入白。

衛入海。

淇、漳、汶、溇、桑入衛。清入淇。沙、易入溇。溫、義入易。洋入桑。

淮入海。

汝、潁、淝、渦、濠、池、泗、邗、沫入淮。湍入汝。洧入潁。汴、沂、睢入泗。

南水。

江入海。

皂江入江。

大渡河入江。沫水入大渡河。

金沙江入江。大姚江、打冲河、瀘水、滇池、牛欄江、馬湖、泉江入金沙江。大保河、渠濫州入滇。

永寧河入江。

資江入江。支江入資。

南江入江。

嘉陵江入江。巴、涪入嘉陵江。

烏江入江。翁首河、南明河、湘江、龍底江、思印江、河由江入烏江。

入湖。泊水、建節水、德興、大溪入鄱。上饒江入湖。永平溪、玉溪、儲溪、白塔河、宋溪入上饒江。

修水入湖。

皖水入江。

池河入江。

大通河入江。

荻港入江。

漳淮入江。

青弋江入江。

巢湖入江。肥水、桃溪入湖。

秦淮入江。

滁河入江。襄水、清流水入滁。

北運河入江。

南運河入江。

太湖入海。

茗溪、荆溪入湖。

浙入海。

軒駐溪、壽昌溪、東陽水、桐江、浦陽江、錢清江、曹娥江入浙。

姚江入海。

靈江入海。

永寧江入海。

永嘉江入海。

安陽江入海。

連江入海。

建水入海。

東溪、西溪、南浦溪、松溪、樵溪、海溪、沙溪、尤溪入建水。

洛陽江入海。

晉江入海。

漳江入海。

汀水入海。

廣江入海。

右江會左江爲廣江。

福祿江、融水、洛青江、牂牁江入右江。

白石江、瀟湘江、龍江、西江、水、八尺江、清江、武流江、秋風江、東班江、寶江入左江。

明江、崇善水、馱排

江、歸安水入龍江。

烏江、白馬江、繡江入廣江。

灘江入廣江。陽江、銀江、相思江、荔水入灘江。

陸川、東安水、瀧水、新江、綏江入廣江。

湑水入廣江。杜安水、凌江水、朔水會湑水、黎溪。武水、翁溪、湟水入湑水。

龍川入廣江。西江、增江入龍川。

漠陽江入海。

鑑江入海。

廉江入海。

欽江入海。 瓊海潮候。

元江入海。

瀾滄江入海。

樣備江入瀾滄江。 西洱海入樣備江。

大盈江入海。

麓川江、潞江入大盈江。

今水經

黃宗羲 學

北水

河水 源出吐番朶甘思之南。曰星宿海。四山之間有泉百餘泓。湧出匯而爲澤。方七八十里。登高望之。

若列星。故名火敦腦兒。譯音星宿。其地在中國西南。直四川馬湖府之正西三千餘里。雲南麗江府之西北一

千五百里。較之崑崙。殆爲近焉。東北流百餘里。匯爲大澤。又東流。號赤賓河。又東。忽蘭水合乞里出河。來

入之。其流寔大。始名黃河。又東北流。分爲九派。復合爲一。水始渾濁。又東行二十日。至大雪山。名騰乞里

塔。卽崑崙也。繞崑崙之南。折而東。亦入思河入之。又折而北。納鄰哈喇河入之。哈喇河出西番白狗嶺北。西北流五百餘里入河。又折

而西。乞里出河入之。又西。鵬穆河入之。鵬穆河出西番鵬穆山。西流七百餘里入河。復繞崑崙之北。又轉而東北。過大通城。又東北。

遡水西來入之。遡水出西寧州宿軍谷東流五百里入河。河水又東北。至陝西河州城。又東。〔案別本無又東二字及下逕字。〕北逕八十里。積石山。河

水自大雪山至積石山。行約二十餘日。河水又東北。過西寧衛南。鳳林河從南來入之。河水又東。過河州

北。湟水合浩亶河。音闕。從北來入之。浩亶河自甘州經山丹。永昌。涼州。至河州。北會湟水入于河。湟水源自西番。經西寧州。南過河州。北入浩亶河。河水又東。至莊浪界。洮

水入焉。洮水源出臨洮府城西南一百五十里西傾山東北流經臨洮府城西南西流會河州水北入于河。河水又東過蘭州經靖虜衛北五里金水注之。過寧夏衛

城東南四十里至衛境東北出塞外經沙漠三受降城折而南西入山西境由東勝州歷廢武州西北二

百五十里過延安府綏德州境東吃那河合奢延水自河套北來入之。吃那河自宥州東南流至夏州奢延水西來入之。又東流逕銀州入綏德州境東南

流入于河。河水又南流逕延川縣東延水注之。延水源出延安府安塞縣西北蘆關嶺東南流入膚施縣境逕延長縣入于河。河水又南逕石州寧鄉西入平

陽府境逕石樓永和大寧縣吉州出龍門口。龍門山在河津縣西北三十里。過河津縣西汾水入焉。河水又南過滎河縣西

逕郃陽城東至朝邑縣洛水西來入之。洛水源自慶陽府界東南流逕鄭州同官過朝邑縣南東入河。河水又南過蒲州城西。自河源至此凡九千餘里。涑水

西流入之。涑水源出絳縣為絳水逕聞喜夏縣安邑猗氏臨晉至蒲州入于黃河。至華陰潼關渭水從西來注之。河水又東逕芮城南過闕鄉縣北

又東過陝州北逕平陸縣南流五十里至底柱又東逕孟縣南又東逕洛陽北洛水從南來注之。河水又

東逕鞏縣北溫縣南過汜水縣北濟水從北來注之。河水又東過滎陽縣北至武陟縣東沁水從北來注

之。河水又東過中牟縣北汴水入焉。河水逕開封府至兗州府曹縣界分為二派其一東北流過濮州境

東南六十里同北清河。一名會通河。合衛以入海其一東南流至徐州同南清河。一名泗。由淮以入海。

黃河舊在開封府城北四十里。東至虞城下。達山東濟寧州界。洪武二十四年河決原武縣黑陽山下。東逕府城北五里。又東南至項城縣出境入淮。而故道遂淤。永樂八年復疏入故道。自是河分爲二。正統十三年又決。滎陽縣東逕開封府城西南。自是汴城在河之北矣。又東南逕陳留。自亳入渦口。又逕蒙城至懷遠北。而入于淮焉。

汾水 源出太原府西北靜樂縣北一百四十里管涔山。逕府城西二里。西南流。歷清源、交城、文水、祁縣。至平遙、介休。過汾州城東二十五里。南入平陽府境。逕靈石、趙城、洪洞。臨汾之西。歷襄陵、太平之東。

案別本有

南 過絳州、稷山、河津北。過滎河。西注于河。

渭水 源出臨洮府渭源縣西二十五里南谷山。至烏鼠山下。轉而東流。逕渭源縣北二里。過鞏昌府城

北五里。東流。漳水從西注焉。

漳水源發漳縣西木賽坡西北。會西傾山水。西南會木市谷水。逕縣南三里。東入于渭。

渭水東流。至清水縣。清水西來注之。渭水

東流。逕鳳翔府寶雞縣治南。又東。汧水北入之。

汧水源出隴州西四十里。岍山南流。逕汧陽縣。至寶雞縣。東入于渭。

渭水又東。逕岐山、扶風二縣。入

西安府界。歷盩厔、興平、咸陽。逕府城北五十里。又東。涇水會焉。渭水又東。過渭南縣北。至華陰界。沮水北來注之。

沮水來自延安府宜君縣。至耀州富平縣合漆河。漆河源出扶風。古漆縣西北。逕同官縣。至耀州。南同沮水。至同州朝邑縣。東南入于渭。

渭水又東入于河。

涇水 源出平涼府界筭頭山。逕涇州。又東南。至邠州北界。馬蓮河從北來注之。

馬蓮河有二源。一名東河。來自沙漢。至慶陽府城合。鬪安

川及灃溝水南流。與西河會。一名西河。源出環縣北七十里。為環江流。逕縣城西南。入安化縣界。逕慶陽府城西。名西河。合陽。集澗水。谷溝。下馬。汀諸水。由西轉南。會于東河。至合水縣西南四十里。為馬蓮河。南流入眞寧縣界。會九龍川。又南入涇水。

涇水又

東南。過醴泉之東。涇陽之西。至高陵縣界。入于渭。

洛水 源出陝西商縣西北一百二十里。謹舉山。東流。逕洛南縣北五里。為洛河。又東流。入河南盧氏縣。

歷永寧。宜陽。又東。過洛陽縣南。澗水從北來注之。

澗水源出瀾池縣東北二十三里。白石山。東流。逕新安。洛陽東南入于洛。

洛水又東。灋水從北來注

之。灋水源出洛陽縣西北五十里。穀城山。東流入于洛。

洛水又東。至偃師縣。伊水從西來注之。

伊水源出盧氏縣東南一百六十里。閭頤嶺。東流。逕嵩縣。洛陽。至偃師界。入于洛。

洛水又東

過偃師縣南。又東北。過鞏縣東。又北。入于河。

濟瀆 源發河南懷慶府濟源縣西八十里。王屋山下。曰沘水。既見而伏。復出于濟源縣西北三里。東流

為濟。有二源。東源周圍七百步。其深莫測。西源周圍六百八十五步。其深一丈。兩源合流。至溫縣。南入于

黃河。與河合流。又東。過成臯縣北。又東。過滎陽縣北。濟水性下且勁。過黃河之南。溢而為滎。往來若斷若

續。或伏或見。濟水又東。過原武。又東北流。過陽武縣北。濟水又東。逕封丘縣北。為北濟。過封丘縣南。為南

濟。北濟又東。逕開州。又東北。過壽張縣西界。安民亭南。汶水從東北來注之。濟水又東北流。逕東阿縣界。

又東北入濟南府界。逕長清、濟河、歷城、濟陽、齊東、武定、青城、濱州、蒲臺、利津諸州縣界。入于海。南濟又東過曹州境。又東過定陶縣南。又東過金鄉、魚臺縣南。東入于泗。由徐邳達淮以入于海。

汶水 其源有三。一發濟南府城南七十里太山之旁仙臺嶺。一發萊蕪縣東五十里原山之陽。淄水出原山之陰。

二發萊蕪縣寨子村。至泰安州靜封鎮合焉。名曰塹汶。西南流與泰安州東南四十里徂徠山陽之小汶河合。又西南流入兗州府境。逕寧陽、平陰、汶上縣界。又西至東平州界。注于大清河。大清河卽濟河之故道。蓋濟水伏流不見。故惟汶水由濟以入于海。

沁水 源出山西沁州沁源縣北一百里綿山東谷。南流入平陽府岳陽縣界。東流至沁水縣城東五十里。南流穿太行達濟源河。過河南懷慶府城北二里。逕武陟。入于河。

汴水 源出滎陽縣大周山。合京、索、須、鄭四水。須水源出滎陽縣方山。北流入汴。索水源出滎陽小隱山。北流入京水。京水源出嵩諸山。逕鄭州西南十五里。東北入鄭水。鄭水源出鄭州城東二

十五里。東北至中牟縣。下入于汴。東南至中牟縣。北入于黃河。

汴河舊自滎陽縣東。逕開封府城內。又東合蔡河。名萇荇渠。東注四州。至徐州城北。入于河。後因河決。蔡河湮沒。而汴自中牟入河矣。

遼水 源出塞外自三萬衛西北入境南流。大清河合小清河入焉。

大清河源出三萬衛東北分水嶺。南流逕城東南十五里。合小清河入遼。小清河源出蓋州衛

分水嶺。西南流逕城南。又西流合泥河。

遼水又南流逕鐵嶺、瀋陽、都司之西境。廣寧之東境。珠子河從西北來注之。

珠子河源出廣寧東北一百

里白雲山。南

流入於遼河。渾河合太子河從東北來注之。

渾河一名小遼水。源出塞外。西南流至瀋陽衛。合沙河。又西南流至都司城西北。入于太子河。太子河一名太梁水。源出幹羅山。西流五百里。至都司城東北五里。

折而西南流。至渾河。合為小口。入于遼河。

又南至海州衛、三岔關、入于海。

約行一千三百五十里。

鴨綠江

源出長白山。其山去金故會寧府南六十里。其顛有潭。周八十里。北流為混同江。東流為阿也

舌河。南流為鴨綠江。去三萬衛東北十餘里。西南流逕遼東都司城東五百六十里。大蟲江入焉。

大蟲江源出龍鳳山。

南流入于鴨綠江。

又西南至安市入海。

混同江

源出長白山。北流逕金會寧府。過五國城。又北合松花江。東入于海。

松花江

源出長白山。北流逕金故南京城。合黑龍江。

黑龍江源出北山。即黑水靺鞨之舊居。南流約二千餘里。入于松花江。

至海西。入于混同江。

大凌河

源出大寧。自義州衛西六十里入境。南流逕廣寧。左右屯衛界入海。

小凌河

源出大寧。自廣寧左屯衛西入境。合女兒河。吟刺河南流入海。

膠水 源出膠州西南一百二十里鐵礮山。過密州五弩山。鹵水入焉。又北過高密縣。注瀦澤。與張奴水合。由澤北入新河。逕平度州昌邑縣界入海。

濰水 源出莒州西北九十里箕屋山。自密州諸城縣界流入高密縣境。逕昌邑濰縣界東北入海。

丹河 有二。東丹河源出昌樂縣東南二十里方山。西丹河源出臨朐縣丹山。二水皆北流。至昌樂歷城西合流。至壽光縣東入于海。

沽河 有二。大沽河源出登州府黃縣蹲犬山。小沽河源出萊州府東南馬鞍山。大沽南流。小沽東南流。至平度州乃合。至膠州卽墨縣入海。

墨水 源出平度州墨山。南流至卽墨縣界入海。

淄水 源出泰安州萊蕪縣原山。北流逕臨淄至壽光縣。時繩之水注之。繩水源出臨淄縣西申池。北流入時水。時水在臨淄縣西南二十五里。又

東北入于海。

灤河 源出宣府城西一百二十里炭山。冰井亂泉合爲此河。北流逕古桓州南下。流入開平。東南流逕遷安縣界至盧龍縣。漆河西南流來注之。漆河源自口北入桃林口。南流至遷安縣東北七十里。爲青龍河。東流逕永平府城西門外爲漆河。入于灤。灤河又南至樂亭

縣界入于海。

白河 上流自宣府城東北三百里

〔案別本作三十里〕

雲州獨石東南流逕古北口至密雲縣西黃花鎮川河西

來注之

黃花鎮川河源自塞外流入黃花鎮逕昌平至懷柔縣入于白河

白河又東南逕順義縣東潮河東來注之

潮河在密雲縣東南下流逕順義縣入于白河

白河逕通

州至武清縣東南為直沽下流會衛河為丁字沽入于海

衛河 一名御河漢名為屯氏河源出河南衛輝府輝縣西北七里蘇門山東流逕衛輝府城北一里又

東流淇水西北來注之

淇水源出彰德府林縣西大號山流逕淇縣西北三十里合清水清水源出輝縣西南七十里山陽鎮東南流逕獲嘉縣界又東南至淇縣界注于淇淇水又東流入衛

衛水又東流過

大名府濬縣內黃界漳水入焉衛水又東北入東昌府館陶縣西二里至臨清汶水

即會通河

北流入之過東

昌府武城縣界入濟南府境逕德州城西北過河閒府界去景州城東二十里歷故城吳橋東光縣境下

至滄州西流逕興濟縣入青縣界合濬沱河衛河又東北過靜海至武清與桑乾河合又東北入于海

漳河 其源有二一名濁漳出山西潞州長子縣西五十里發鳩山東北流逕潞州城西南二十里過襄

垣黎城二縣自林縣西北入彰德府境一名清漳出平定州樂平縣西南二十里少山西南流過和順之

西北四十里石堠嶺下流逕遼州東七十里又西南入潞州黎城縣界自涉縣西入彰德府境二漳俱東

至林縣合流至彰德府為漳河逕臨漳入廣平府境歷成安廣平肥鄉曲周入于衛河

滹沱河 源出山西繁峙縣東北三十里泰戲山歷代州寧縣忻州定襄五臺孟縣北入真定府平山縣界。逕靈壽縣至真定府城南逕晉州過保定府境東鹿縣南三十里達于深州至阜城縣沙水入焉。沙河在沙

河縣治南逕廣平府城五十里下達雞澤縣界洛河入之洛河源出遼州太行山至武安縣柏林里伏流至洛遠里復出東逕廣平府城北三十五里至雞澤縣界入于沙河沙河又逕鉅鹿隆平二縣至寧晉縣匯為大陸澤過冀州境西北三十五里至武邑縣北界三十里為夾河逕阜城縣西北為胡盧河。滹沱河歷河閒府獻縣城南易水注之至交河縣與高河合為交河至青縣入即衝漳之別名也入于滹沱河于衛。

易水 源出易州閻鄉西山東過涿州南又東過安州城北與保定府境沙河合焉。沙河源發山西繁峙縣白坡頭流逕定州新樂縣

界至祁州唐河北來注之唐河源自大同府靈丘縣南逕飛狐口倒馬關過唐縣東南至祁州入于沙河沙河又逕祁州城西南二十里至博野縣滋河來注之滋河源出靈丘故回山逕行唐縣張茂村伏流不見至此定府界南孟社復出東南流逕無極深澤二縣過祁州城西南三十里入于沙河沙河又東入于易水。案滋河源出靈丘故回山元本云源出山西故回山考陸隴其畿輔八府地圖記作故回靈壽縣志云故回府志原本作放回誤金史繁峙有梅迴鎮今據以改正。易水又東至雄縣南

為瓦濟河溫義河來注之。溫義河源發易州城西五迴嶺逕滿城縣北十里名大册河至清苑縣北十五里名徐河逕安肅縣西一十里至新安縣南八里與曹河合曹河出安肅縣南三十里入于徐河徐河合曹河曰溫義河又南

與長流河合至雄縣南入瓦濟河。至保定縣為磁河過河閒府境任丘縣西六十里至獻縣五里鋪入于滹沱河。

桑乾河 源出大同府馬邑縣西北十里洪濤山下與金龍池水合東流過渾源州北逕宣府保安州新

城西南四十里洋河東南流來注之

洋河源出境外逕宣府城南五里東流逕保安州城西南一十里〔案別本作一十五里〕又東南入于桑乾河

又東入宛平縣境為蘆

溝河至看丹口分為二派其一東流出通州高麗莊入白河其一南流逕固安至武清縣小直沽入于衛河

淮水 源發河南南陽府唐縣東南一百八十里桐柏山其支岡有水潛流三十里東出大復山又東逕

汝寧府確山縣信陽州息縣至新蔡縣南汝水從西北來入之入潁上界至壽州西北潁水入之又東淝

水入之

淝水源出宿州龍山湖東流至懷遠縣入淮

至懷遠縣渦水入之

渦水源出河南太康縣自黃河東流逕蒙城縣北沿懷遠縣東北入于淮

淮水又東至鳳陽府北境濠

水入之

濠水有二源東源出鳳陽府舊城南六十里鐘乳山西源出府南八十里鏤鄉山至昇高橋合流逕府舊城西南有石絕水謂之濠梁又東南逕新河口入于淮

又東池水入之

池河自廬州府界流入歷定遠縣南一百四十

里北流

入于淮

又東北入泗州至清河口泗水入之又東邳溝南入焉

邳溝自大江至揚子鎮南為伊婁河又自大江由儀真縣南為獅子河東北流逕揚州城東南北通射陽湖為

邳溝入淮

淮水又東濳迴淮安府城北五里又東沫水入之過安東縣東入于海

汝水

源出河南汝州天息山東流過郟縣南又東南滷水合沙河入之

滷水源出魯山縣西堯山流至葉縣入沙河沙河源出桐柏山東流合三里河

入汝
過襄城縣。又東南過鄆城縣北。又東南入汝寧府境。逕汝陽上蔡。又東南逕新蔡。東流入于淮。

潁水 有三源。左源出登封縣東二十五里陽乾山。中源出嵩縣少室山。右源出少室南溪。流入鈞州界。

又東南過許州。又東南過臨潁。扶溝二縣。又東南。〔案別本無南字。〕洧水東流注之。洧水源出密縣。東至新鄭縣。會溱水爲雙泊河。至西華縣。入潁。溱水源出密縣。

又東過西華縣北。又南過太和縣北。又東南過潁上縣北。又東南入于淮。

泗水 源出山東兗州府泗水縣東五十里陪尾山。四泉並發。故以爲名。循泗水縣北八里始合爲一。西

逕曲阜縣。貫府城。下至濟寧州。分流南北。北流謂之北清河。南流謂之南清河。北清河亦名會通河。在濟

寧州南。自濟寧分水閘至東昌府臨清閘。凡四百餘里。自濟寧則引泗洸及徂徠諸山谷水注之。至沙灣。

則引黃河支流自金龍口者合之。自兗州府陽穀縣入東昌府境。至府城東南。北達臨清。入于衛河南清。

河南流過沛縣。至徐州城東北。汴水從西來注之。循城東南至邳州境。沂水從東來注之。沂水源發山東青州府沂水縣西北。

一百九里雕厓山。南流逕縣南二里。至沂州。沭水入之。沭水源發大嶷阜。東州府沂水縣西北。南流逕沂州郟城縣入邳州界。合沂水。沂水西流過下邳城西。西南入于泗。泗水又南至宿遷縣。睢水入焉。睢水有二。一在陳留縣東北四十里。

東逕睢州。達寧陵縣。一在夏邑縣南二十里。逕水城縣合沙白水。過宿州城二十里。

逕靈璧縣北。入徐州境。城南二十里。東流逕睢寧縣界。又東北至宿遷縣入泗水。

爲大小二濟河南達于淮。泗水又南至濟河縣西北三汶河口分

南水

大江 源出蜀之茂州岷山故名岷江。

徐安祖邈江紀源曰禹貢岷山導江乃汎溢中國之始非發源也中國入河之水爲書五入江之水爲書十一計其吐納江陪于河按其發源河自崑崙之北江亦自崑

崙之南非江源短而河源長也。

南流逕茂州城西南入威州境過汶川縣而東南至灌縣別爲二一渠由永康軍過新繁入

成都謂之外江一渠由永康過郫入成都謂之內江合于成都府城南過金馬口至新津縣阜江水入之

阜江源出岷山逕溫江縣治西

南東流入成都府界注于岷江

岷江至眉州城東七里墓頤山下爲玻璃江逕夾江縣

即平羌

繞烏尤山下

在嘉定州治東

至嘉定州與大渡河合岷江又東南至敘州府城東與金沙江合

即馬湖江

又東永寧河入之

永寧河源自七星關北西北流逕烏撒貢

水寧城又西北逕納溪縣北流入江

(案七星關別本作七里關)過瀘州治城東爲瀘江入合江縣界資江來注之岷江又東北過重慶府東南

江來注之

南江在南川縣衆溪會合至三溪方通舟楫行三十里至綦市自綦市至南江口合于大江

大江至重慶府東北與嘉陵江會大江又東至涪州與烏

江合又東過忠州萬縣至夔州府雲陽縣開江來注之

開江源自新寧縣霧山逕開縣治南合清江過雲陽入涇

大江逕夔州府入瞿唐峽

過巫山歷歸州夷陵至宜都縣清江

一名夷水

來注之

夷水自紹慶發源繞施州衛城東流入荊州府界逕建始縣境流入長陽縣南至宜都縣入于大江

大江逕枝江縣

界。沮江入之。沮江在當陽縣北出房陵縣過臨沮縣界漳水入之漳江源自臨沮縣南至當陽縣北與沮水合流通沌江〔案通別本作過〕沌江在當陽縣治南至枝江縣界入于大江。大江至松滋縣北分爲

三派下流三十里復合爲一達于江陵至荊州府城南爲荊江逕公安石首而東與漢江合過城陵磯下

合洞庭諸水逕岳州府臨湘縣其流清者爲洞庭濁者爲大江又東自嘉魚縣入江夏境至州西沔水入

焉。沔水源自襄水逕漢陽府城西南三十里爲沔水南入大江。過漢陽府城東南至漢陽縣界澚河入之。澚水發源在河南維山縣南流逕黃陂縣東

入于又過蒲圻縣陸水注之。陸水自巴陵歷通城崇陽二縣境北過蒲圻縣入于大江即陸口東流逕武昌縣入黃州黃陂縣界至黃州府城下

赤壁磯東過蘄水縣入九江府西境龍開河入之。龍開河源發瑞昌縣清溢鄉東由大江逆泛爲鶴問湖距九江府城西二十五里又濂溪自廬山西流逕九江城南一十五里下流合龍開河

入于至九江府城北爲尋陽江下流四十里合彭蠡湖水又東流至安慶府城西皖水來注之。皖水出安慶府潛山縣北

逕安慶府城西入于江。大江環安慶府西南東三面北流至東流縣又折而東過池州府北池河北流來注之。池河源出標山流爲

管公明溪歷龍鬚河會于秀山倉埠潭過白面渡匯爲秋浦秋浦在池州府城西南八十餘里又北流入于大江下至銅陵縣大通河來注之。大通河在銅陵縣西四十里其源一出九華山一出旌衡山會于車橋湖至大

通鎮入至荻港驛荻港河北來注之。荻港河在銅陵縣北八十里源發朱村書即坑邵家澗會石澚南洪鳳凰貫上中下各書之水合流至北下社入于江又東漳淮來注之。漳

于江

今水經

源出寧國府南陵縣南六十里呂山。至縣東溪與中港四港之水相合。流入小淮河。至石磯。西出魯港。魯港一名魯明江。在太平府蕪湖縣西南三十餘里。與繁昌縣分界。入于大江。

大江南逕無爲州。又過太平府城

西北七里。

〔案七里別本作又東〕

青弋江來注之。

青弋江源出涇縣及池州石埭。合中流出蕪湖。入于大江。

大江又南過和州界。巢湖來注之。

巢湖一名焦湖。周圍

四百餘里。港汊大小三百六十。占合肥舒城廬江巢四邑境。肥水桃溪皆注之。肥水源發廬州府城西北四十里雞鳴山。北流三十里分爲二。其一西北流入淮。其一東南流貫廬州府城。過金斗驛。入于巢湖。桃溪發源六安州界。逕舒城縣北三十五里。入于巢湖。巢湖下流其一東南流。逕無爲州和州界。爲柵江。卽濡須口。入于江。其一東流。逕和州城北。爲烏江。入于江。又過應天府西北。秦淮入之。秦淮在上元縣東南三里。西北入于大江。大江又逕六合縣。滁

河北來

〔案北來別本作東來〕

注之。

滁河源出廬州府。過全椒縣。與襄水合流。至滁州東南三汊河。會清流。水逕六合縣。入于江。

大江又逕揚州府儀真縣南。支流爲北運

河。大江又逕鎮江府城西北六里。南運河入焉。逕常州府城北五十里。過江陰縣西。泰州東南。至常熟縣北。通州南。入于海。

大渡河

原出吐番。南流爲若水。東流逕黎州城南九十里。爲沈黎江。過越巂衛城北。至夾江縣。沫水入

之。沫水源出雅州。逕天全六番招討司。東南流至雅州城北。青衣水入之。又東南至夾江縣西九十里。入于大渡河。

又東北至嘉定州。入于岷江。

金沙江

源出吐番。共龍川。犂牛石下。名黎水。流逕雲南麗江府巨津。寶山二州。又逕鶴慶府。由西而東。

環北勝州。治至姚安府。大姚江來注之。

大姚江源出大姚縣東北一百五十里。經案山。西流至大姚縣西北。合鐵索管之水。折而南流。至縣西南。合姚州小欄村之水。折而東流。繞縣南。蜻蛉河入之。復東北流。

入于金沙河。

又東打冲河從北來注之。打冲河源自打冲河中在所逕中前所至普濟南流約千里入于金沙河。金沙江又東入黎溪州。至會川衛城西南

二百五十里。瀘水入焉。

瀘水源出吐番南流。寧番水西流入之。逕建昌城西。邛湖水西流入之。又南流逕會川衛境。西入于金沙江。

金沙江又東。過武定府元謀縣北。滇

池水入之。逕東川府境西一百五十里。折而至府東。牛欄江從南來注之。

牛欄江其源出西河。在雲南馬龍州治西。東流合東河。東河在馬龍州治東。入

尋甸府爲牛欄江。逕東川府東南一百二十里。〔案別本二十作三十。〕北流入金沙江。

金沙江過烏蒙府西南二百六十里。又東北。至敘州府城西南一百

三十里爲石門江。馬湖水入之。

馬湖在馬湖府城西一百八十里。蠻夷長官司前。馬湖在山。積長二十里。廣七里。

又東。泉江南流來注之。

泉江在芒部府西北二百八十里。

過敘州府城南。入于岷江。

滇池。一名昆明池。周廣五百餘里。在雲南府城南。源出尋甸府治西南六十里。果馬山。爲龍巨江。

一名龍濟。

流經嵩明州東南一十五里。入嘉利澤。

澤周百餘里。

又自嵩明州故邵甸縣之東山西山。凡九十九泉合流。

經雲南府城東爲盤龍江。又南與黃龍溪諸水。合爲滇池。又大堡河北流入之。

大堡河出新興州界。經晉寧州。水與壙。分流北入于滇池。又

渠濫州東北流注之。

渠濫州在昆明州東南五里。東北流入于滇池。

滇池下流爲螳螂川。蔡迺安寧州治。過昆陽州富民縣。過武定入

于金沙江。

資江 一名中江。源出汶山。自洛口分支。經漢州及新都縣。東流入簡州資縣界。過內江縣西五里。經富

順縣瀘州城北。支江來注之。

支江源自富順縣鷲窩溪。經安夷鎮。過瀘州城北。入于資江。

資江至合江縣界。入于潛江。

〔按圖〕西漢水源出陝西沔縣西一百二十里嶓冢山。流經四川保寧府廣元縣界。歷昭化。過劍川。至保寧府閬中縣。曰閬水。至順慶府治東。又東。至合州治東北釣魚山下。合巴水。嘉陵江。至合州治前。又與涪江合。過重慶府城北。東流入于潛江。

巴水 源出陝西漢中府西鄉縣六十里巴山。流經四川達蓬、廣安三州。至渠縣東爲渠江。又東經順慶府界。流至合州治東北。與嘉陵江合于渠口。

涪江 源出吐番。下歷綿州入潼川州東南。又東南流。經遂寧縣至合州。入于嘉陵江。

烏江 志名牂牁江。以江出于牂牁郡也。其源有二。東源出自程番府界。東北流過龍里衛西。翁首河東

入之。翁首河在龍里衛平伐司東。南二十五里。下流入清水江。至貴州城南。南明河西入之。南明河在貴州城南。東北流過巴鄉西。歷平越衛西境四十

里。過新添司。經貴州城東境一百五十里爲清水江。過谷龍爲紫江。由眉潭入于西源之烏江。西源出自安順州西堡司西北五十里。東北流經司治前爲谷隴河。貫州城。過金筑西境。至威清衛城西。爲的澄河。

遼衛城北經青山司北至陸廣驛西爲陸廣河過清河驛及黃沙渡巡司南距貴州城北境二百里爲烏江南岸有烏江關乃貴播之界河也遼播州司南至東境七十里湘江入之

湘江源出播州西北四十里龍岩山麓流經湘山過播州司東爲湘江南

入烏經容山司東與東源之江水會烏江又東北經石阡府西境一百五十里龍底江來入之

龍底江在石阡府城南西

流入于思南大江烏江又東北入思南府境西南十里鮎魚峽東流過府治南爲水德江又東流過印江縣思印江

北流入之思印江源出期溪司經印江縣北流入于德江又東北經沿河司河由江入之

河由江源出銅仁烏羅司經沿河司治北十里入于水德江

又東北至彭水縣

爲黔江歷新灘關灘至涪陵入于川江

〔按圖〕嘉陵江卽漢水〔案別本作東漢水〕源出陝西鳳縣東嘉陵谷歷兩當縣過略陽縣治西會東谷諸水流經

漢中府城南三里歷洋縣石泉縣南過金州北漢水又東過郿西縣南又東北屈東南過均州東北過光

化縣西南漢水又南逕穀城縣東均水入之

均水源出浙川縣北山南流過郿邑南又東過谷城南東入于沔

漢水又東過襄陽城北又東南消

水從北來注之

清水一名白河源自河南府嵩縣雙溪嶺東南流經南陽府城東三里歷新野縣會梅溪洱灌漚水流山黃渠渠疏四潦力等河與泌水合流南至襄陽府城北入漢漚水源出南陽府鄧州內鄉縣東一十二里熊耳山鎗竿嶺東南

澧經內鄉。繞鄂州城北三里。轉東南會趙林沙澧黃水等河。至新野。入于清水。泌水源出泌陽縣東四十里。桐柏山。東流為淮。西流為泌。經唐縣北。轉西下流。會清水。三家入。疊牡丹。昆江。桐浚等河。至襄陽府界。入于清水。漢水又南經安陸。

州治西過宜城縣東。夷水東流注之。夷水一名變冰河。發源自房縣界。經南漳。過宜城西南六十里。入於漢。漢水經潛江縣。分爲潛江。入于江。潛江水自

江出爲沱。漢出爲潛。今潛江漢水循源而下。經潛江縣界。入于大江。漢水又東南。白水注之。白水源出漢川縣西北界。經縣南一百二十里。入于漢。又經當陽縣之東。漢水又東南。

涓水入焉。涓水源出德安府東北四十里。陪尾山石岩下。逕德安府城西。隔灌河入焉。灌河源出德安府城西二十里。白兆山下。達雲夢。蓄于港口。入涓河。涓河又東流。入于漢。漢水又東南。至荆門州東九

十里。至大別山。入于江。其水自蟠冢爲漾水。沔縣爲沔水。漢中爲漢水。至荆山東爲滄浪水。蓋因地而稱名也。

洞庭湖。在岳州府城西南。一名九江。沅、漸、无、辰、敘、西、澧、資、湘九水皆合也。又沅、資、湘最大。皆自南而入。

荆江自北而過。洞庭瀦其閒。名爲五瀦。

湘江。源出廣西興安縣海陽山下。西北流。至分水嶺。分爲二派。曰灘水。流而南。曰湘水。流而北。合越城。

嶠水。至全州。又合洮、灌二水。洮水源出全州北二十里。文山下。流入于湘。灌水在灌陽南九十里。流經全州。入于湘。經東安縣。盧洪江來注之。盧洪江在東安縣治東。東南流。

入于。至永州府城西南。永水來入之。永水源出永州府城西。南一百里。永山入于湘。又東北入永州府界。至湘口。與瀟水合。曰瀟湘。經

永州府城北一十里。又東經祁陽西北。祁水東流來注之。祁水源出寶慶府邵陽縣界東北流九十里至祁陽縣治北東流入于湘。湘江經常寧縣西。

春陵水從東來注之。春水源出道州寧遠縣東北七十五里春陵山。東流經桂陽州藍山縣界。又東流至桂陽州界北三十里歸水入之。歸水源出道州寧遠縣九疑山。東流經藍山縣界南。又東北經桂陽州。入于春陵水。春陵水又北至

常寧縣界。湘江至衡州府城東與蒸水合。曰蒸湘。蒸水源出寶慶府邵陽縣耶藍山。東北流至衡陽縣界。會清陽水。又北流經衡州府城北入于湘。至衡州府東北。郴

江來注之。郴江源發郴州城南三十六里黃岑山。北流經郴州城東為郴江。下流。耒水入之。經永興縣至森口。栖風水入之。郴江經衡州府耒陽縣界。歷府城北。至耒口。入于湘。耒水出桂陽縣南五里耒山。西流資興水入之。又西流八十里水勢險隘。北入郴

水。栖鳳山源出桂陽州南二十里郴州城西九十里龍度山。東北流至郴州界。過郴州城北五十里為栖風水。又西北流經栖鳳渡。白豹水入之。流至森口。入郴州。湘江又東流入長沙界。至於陵江口。攸水

西流來注之。攸水一名伯水。源出江西安福縣封侯山。西流經攸縣東一十五里為攸水。沘水入之。沘水源出鄱縣沘泉。經茶陵縣西北至攸縣東七里入攸水。攸水又至茶陵江口。入于湘。湘江又北。漣水從東

注之。漣水一源自江西袁州府萍鄉縣北七十里楊岐山。為岐水。西流過萍鄉縣前。下入醴陵縣境。會縣東漣山之水為漣水。過其縣南。風從縣西北流。至漣浦。入于湘。又北。漣水東流來注之。漣水資水之別源。出寶慶

府邵陽縣東八十里長沙府湘鄉縣西一百八十里龍山。案別本作大龍山。其水分為二派。一入邵陽為邵水。一入湘鄉為漣水。又漣水在長沙府城北五里。源出大圍山。

入于漣。合流九十里。會側水。繞破石。轉至縣南。漣而為澤。又東過石潭百餘里。東流入于湘。又北。過長沙府西。瀏水從東來注之。瀏水在長沙府城北五里。源出大圍山。有二源。曰大溪。曰小溪。合流經瀏陽縣

四名渭水過縣前名
渭水西流入于湘

又北。瀉水從西南來注之。

瀉水在長沙府城北二十里。源出安化縣青羊山。流入瀉山青潭中。入于湘。

又北。過湘陰縣。汨水西流來

注之。

汨羅江在湘陰縣北七十里。源出江西寧縣。至岳州平江縣東南。合純盛二水。又西南。會昌水下流。合羅水。羅水自湘陰縣分二水。南流曰汨水。一經古羅城曰羅水。至屈潭復合。故曰汨羅。四流入湘。

湘江又北。至沅江縣。

與沅水合。曰沅湘。會衆流以達于洞庭。

瀟水。源出永州府寧遠縣南六十里九疑山。四水流灌于南海。五水北注于洞庭。至三江口與沱水合。

沱水出九疑山石城。娥皇二峯。至江華縣東南。冰水入之。冰水出九疑山女英峯。至江華縣東南為冰水。入于沱水。沱水又東別為二。又十里合為一。經三江口入于瀟水。舜源水出九疑山舜源峯。流至寧遠縣東西。抑而北。與沱湘水合。營水道州西四十五里。營山東流。

與沱池水合。案別本無池字。經宜陽嶺與舜源水瀟水合。

瀟水又東北流。至永州府城外。至湘口入于湘。

資江。有二源。一出敝浦與靖州綏寧之澗谷閒。一出廣西全州界。經新寧縣南。為夫夷水。至武岡合流。

東下。又都梁水出武岡州城西南來注之。經寶慶府城北。邵水入之。

邵水源出邵陽縣東八十里龍山。經鞍山至寶慶府城北。入于資江。

資江自寶

慶過祁陽縣北。經安化縣西。凡五百餘里。至益陽縣南。過沅江縣。入于洞庭湖。

沅江。源出四川播州。與牂牁江隔嶺而分者也。

此牂牁江。烏江也。

其源自黃平所為黃平河。過偏橋司治西。東流。

處洞河入之。

處洞河源出苗境。東流。經處洞至興龍。斷城合興隆大河小河入于鎮洋江。

至鎮遠府城南。為鎮洋江。

一名澗水。乃五溪之一。巫無澗舞澗。一水五名。聲之變耳。

東流。經清浪

衛清江北來入之。清江一名灑溪在思州府城南下。流合思州諸溪水入于平溪大江。又東經平溪衛至麻陽。錦江入之。錦江其源自銅仁府治西北靈濟洞。經府城西爲銅仁小江。會提溪。

書溪。迤邐江諸水至府治西南爲銅仁大江。入沅州。廊陽縣治西境五里爲錦江。流經縣前。下入沅江。沅水又經黔陽縣西南。又經靖州。會同縣西境。洪江來入之。洪江源出

黎平府洪州司治北下流。至靖州城東。合渠陽江。渠陽江源出靖州通道縣之東北一百里。廣西分界佛子嶺。下合衆。流環靖州城東入于洪江。洪江自靖州治流三百四十里。案二百一作二百。至會同縣西南。洪江驛入于沅江。又經。案一作

激浦縣。敘水來注之。敘水有二源。一出龍潭。在縣南一百二十里。常黔陽界。有溪東流。至巡檢司前匯而爲潭。龍潭之水。由地中行。者二里。出而南流六十里。郵梁之水。自東而始入桶溪之水。又六十里。一源出龍灣。在縣東二十里。自頓

家山出。匯而爲潭。二水至縣前爲雙龍江。經縣西三十里。下流入于沅江。沅水又歷辰州府城西南五里。西水入之。西水源出四川西陽。經辰州府城西南五里。東入于沅。又東辰水

入之。辰水在辰州府東。源出府城東。二百四十里。三嵎山。南流入沅。沅江入常德府桃源縣境。經府城南。東流過龍陽縣。北入于洞庭湖。自發源至入湖。東北流凡二千五百三十里。

澧水。源出岳州府慈利縣西歷山下。流合澧水。澧水在慈利縣。源出歸州。東流至索溪。合四十八澗。而爲一水。南至觀嘉賢。合澧水。至石門縣。澧水來入

之。澧水在石門縣西一百七十里。流經水南山。鯉魚山。合陽泉。南溪水。至縣西四十里。入于澧。澧水又流至澧州城下。澧澹二水來入之。澧水在澧州東二十五里。澹水在澧州城北七十里。又

東。蘭江來注之。蘭江在澧州城東北。源江水入華容縣治北。爲華容河。南匯澧水。又東。過安鄉縣。北入于洞庭湖。

新牆河 在岳州府巴陵縣南六十里發源臨湘縣相思山至灌口注于洞庭

彭蠡湖

一名鄱陽一名宮亭

在九江府城東南九十里闊四十里長三百里經南康府東南西接南昌東抵饒州

鄱在

陽縣西四十里

納贛、盱、鄱、饒、袁、脩諸水北流入于江

贛江 源自章貢而來貢水源出汀州新樂山西西南流經瑞金南入會昌北濂水入之

濂水源出安遠縣北流至會昌縣界

入于貢

貢水又西北流至雩都虔化水、雩水入之

虔化水源出雩都縣經雩都縣境南入于貢雩水源出雩都縣之雩山西南流入于貢

貢水又西北流

來入之激水在興國縣東北又西北流三江水南來入之

三江水在龍南縣後乃桃水瀝水之會流經信豐入于章

又西北至贛州府城東為貢水環

城而北與章水合章水源出南安府大庾縣西南一百三十里聶都山東流至南安府城南為橫江經南

康縣治東北流猶水從西來注之

猶水源出湖廣郴州桂陽縣東北一十七里孤山水風曲北流一百五十里入江西南安府界流經上猶縣治南為猶水東流至南康縣界入于章

至贛州府

城西為章江環城而北與貢水合名為贛江北流一百里凡二十四灘怪石多險至萬安縣折而東流遂

水西來注之

遂水在龍泉縣治南源出左右二溪歷八十四灘入于贛

過泰和縣東雲亭江東來注之

雲亭江一名緡水源發興國縣界經泰和縣南西北流至珠林入于贛

贛江北

流至吉安府城東南禾水東流來注之

禾水源出永寧縣西禾山經永寧縣北至永新縣南為水新江東流盧水注之盧水源出安福縣西二百二十里盧竹山至安福縣城北為盧水東流王江從安福縣東

南東流來合之入于禾水。禾水又東流至泰和縣四五十里爲早禾江。至廬陵神岡山下入于贛。

贛江達吉安府城東。又吉水來注之。

吉水源發永豐縣至吉水縣南爲吉水入于贛。

贛江又北

流。經峽江縣。東至臨江府城南五里爲清江。袁江水東流來注之。贛江又東北流入南昌府豐城縣南。豐

水來注之。

豐水在豐城縣南一百八十里出。自杯山繞豐城劍池。東入于贛。

贛江東北流至南浦。折而北流。至南昌府城西南。蜀江來注之。

蜀江一名

筠。案別本云蜀江一名笛河。源出袁州府萬載縣龍河。流至上高陵江。合新

昌蔭江。歷瑞州府城南而東。匯于南昌之象澤潭。案一本無澤字。入于章江。

贛江達南昌府城西爲章江。又奉新江

東流來注之。

奉新江自寧州歷靖安縣至奉新縣南爲奉新江。東流入于章江。

章江又北流。入于彭蠡湖。

袁江。源出袁州府萍鄉縣西瀘溪。過縣北。又至縣東北。羅霄水來注之。經袁州府城西十五里爲稠江。

至北門外爲秀江。下經分宜縣東南。袁江又東至新喻縣南。爲喻水。至臨江府西境。太平江來注之。至臨

江府南十里。入于清江。自袁州府城至清江凡八百四十里。

脩水。源出南昌府寧縣西六十里幕阜山。自艾城東北流。過南康府建昌縣治南約七百餘里。入于彭

蠡湖。

盱江。源出建昌府廣昌縣血木嶺。流六十里爲盱水。又二十里爲巴溪。又八十里至廣昌縣前。又三十

里入南豐縣境。東北流百餘里。至建昌府城東南。冰壺水東來入之。

冰壺水源出福建泰寧縣界。經新城縣西四十里。飛猿水從新城縣東境西北流來合之。冰壺

水又西北流。盱江又東北流二百餘里入撫州府境為汝水。流經金谿縣南。曲折行百餘里至撫州城東。抱入于盱江。

城西北。西寧水注之。西寧水源出崇仁縣南一百里華蓋山。合宜黃水至崇仁縣西五里為西寧水。下流曲折五百餘里至西津。入于汝水。盱江入南昌界。過豐城縣。東北流至

南昌府城東南三十五里。又東北入于彭蠡湖。

鄱江。源出浮梁縣東北一百四十里榔木山下。西流百里至浮梁縣南為昌江。又西。樂安江來注之。樂安

江源出徽州婺源縣西北五十八里大廣山。為婺水。至德興縣北二十里為德興溪。又西北。建節水來注之。建節水源出廣信弋陽縣西北流經德興縣西南。下流入于樂安江。樂安江又西北。過樂平縣治南為樂安江。下流入于鄱。下流經饒州府

城南門外為鄱江。環城流。至西北復分為二。俱入于彭蠡湖。

上饒江。源自福建建寧府界。流經永豐縣界為永豐溪。西流。永平溪注之。永平溪在永豐縣東四十五里。又西流。玉溪注

之。玉溪在玉山縣東五里。下流入上饒江。經廣信府城北為上饒江。楮溪。宋溪皆西流來注之。楮溪在廣信府城西一十里。宋溪在廣信府城西八十里。二溪俱出靈山。西流

入上饒江。又西北。案別本云。又西流。至弋陽縣東二十里為弋陽江。經貴溪縣南為蕲溪。入饒州府境。經安仁縣前為

錦江。白塔河入之。白塔河在安仁縣東。源發廣信龍虎山及撫州金谿縣。合源入于錦江。下流餘干縣。東北流。由鄱江而入于湖。

北運河 一自大江經儀真縣南爲獅子河。一自大江經揚子鎮南爲伊婁河。俱至揚州府城西爲邗溝。過邵伯。歷高郵州寶應縣。抵淮安府。入于淮。自大江至淮凡三百餘里。

南運河 自浙江杭州府餘杭。經嘉興府西。過吳江縣東。太湖水過之。經蘇州府城西。歷無錫。貫常州。抵

丹陽縣呂城壩。又經丹陽北。練湖水注之。練湖一名練塘。在丹陽縣北。周一百二十里。納長山諸水。凡十二流。〔案別本作十一流。〕又至鎮江府城西爲海鮮

河。北入于大江。自餘杭至京口約七百餘里。

太湖 禹貢曰震澤。周職方曰具區。縱廣三百八十三里。周三萬六千頃。跨湖宜蘇常四郡。距湖州府城北二十八里。蘇州府城西南三十里。常州府城東南一百里。連武進無錫宜興三縣界。其上流自西南而來者爲苕溪。西北來者爲荊溪。苕溪有二。一出杭州天目山。由於潛臨安東流過餘杭縣治。南經錢塘縣境。東北流。至湖州府治東南。入于霅溪。一出湖州天目山。至安吉州。合獨松嶺溪水東流。經府城南爲霅溪。至府城東南與杭州苕溪會。北流注于太湖。荊溪在金壇縣北。源出右荊州城。流入常州界。宜興縣荆南山北。上通蕪湖。下注震澤。志云中江出蕪湖。南東至陽羨入海。震澤分流入于海。其東北流者經吳縣東。同運河爲吳江。

至蘇州府城東。播爲婁江。至崑山縣東南六里爲新洋江。至太倉州東爲劉家河。入于海。其東南流者過三泖。一名華亭谷水。在松江府城西南三十六里。以近山涇圓者曰圓泖。近泖橋闊者曰大泖。自泖而上。

鑿繞百餘里曰長泖。經松江府城北七十二里為松陵江。一名吳淞江。經華亭西南入于黃浦。黃浦在松江府

城東南一十八里。又東北流至上海縣入于海。

浙江 其源有二。一出徽州婺源縣北七十里浙源山。名浙溪。一名漸溪。東流經休寧縣南。率水入之。水率

出休寧縣東南四十里率山。至徽州名徽溪。揚之水入焉。揚之水出績溪縣東六十里大鄣山。西流至臨溪。經歙縣界抵府城西入歙溪。為灘三百六十。至淳安縣南為

新安江。又東。軒駐溪從北來注之。軒駐溪在淳安縣東五十里。又東。壽昌溪從南來注之。壽昌溪在壽昌縣西六十里。經建德縣界。至嚴

州府城南合衢水。一出衢州。金溪北注。文溪南來。金溪源出開化縣馬金嶺。西北流繞縣治名金溪。又轉而東南流。經常山縣東流。文溪入之。文溪出江山縣之石鼓山。東北流。水豐水注之。至

江山縣南名文溪。下流合于金溪。會于衢州府城西二里。名信安溪。環城西北。東流。入龍游縣界。號盈川溪。又東。經蘭谿縣

東。陽水入之。東陽江其源出東陽縣大盆山。一出處州縉雲縣。雙溪合流至府城南為谷溪。西流為蘭溪。至衢州府城東南二里入于浙。又東。至嚴州府城南與歙江合。浙水又東。

至富春山為富春江。又東。至桐廬。桐江北來注之。桐江源出天目山。經桐廬縣北三里。東流入于富春江。又東。浦陽江南來注之。浦陽江源出金華府

浦江縣西六十里深鼻山。經浦江縣界。北流抵富陽。入于浙江。又東。至杭州府城東三里為錢塘江。又東。錢清、曹娥二江入之。錢清江在紹興府城西五十五里。曹娥江

在紹興府城東南七十里錢清曹娥二水入于浙江
三水所會在紹興府城北三十里謂之三江海口

浙水又東而入于海海口有山居其海中潮每晝夜再至其勢

之大小隨陰陽之交變也

鄞江 其源有二一自奉化合它山之水東流經奉化縣北四十五里爲奉化江一自上虞縣太平山經餘姚縣治南名姚江

潮上下二百餘里而水不鹹

歷慈谿縣境東流俱至寧波府城東三港口會名鄞江東流至定海縣

治爲大浹江入于海

靈江 一名澄江

其源一自天台關嶺一自仙居至台州府城西一十里合爲靈江

潮至此而止

經府城南環繞郛郭

東流入于海

永寧江 在黃巖縣西北有二源大源出塵山東南流至左溪村小源出黃巖山東北流至大溪與大源合經縣北東流入于海

永嘉江

舊名填江

源自遂昌經松陽至處州府城南二里爲大溪東至青田縣又合龍泉松溪諸水東南流

至温州府城北爲永嘉江又東入于海

安陽江 在瑞安縣南又名飛雲渡渡之西有中洲東入于海

連江 在連江縣治南東流入于海。

建水 源分東西二溪東溪源出浦城之東西南流約二百里至建寧府城東名東溪過城南至城西入

于西溪西溪源出崇安縣西北分水嶺其下二源過崇安縣北至建陽縣東南交溪東流注之交溪在建陽縣東南合武夷九

曲之水交注于東山下南入建水至建寧府城西名西溪與東溪合為建水又南松溪東來注之松溪源出處州慶元縣之松源經松溪縣南入于建水又南

至南平縣治東西會紫雲溪紫雲溪源發邵武府光澤縣西北至邵武府城北東流經延平府順昌縣西

沙溪來注之沙溪源出汀州府寧化縣水勢險峻如龍門經清流永定至沙縣南為沙溪過縣東至延平府西南入于紫雲溪過府城東與建水合名為劍津又東南流龍溪

入之又東南流抵福州府城南一十五里為南臺江自分水嶺至此凡七百餘里又東南三十里與江東

西峽合流入于海。

洛陽江 源發泉州府惠安縣至晉江縣南二十里入于海。

晉江 源發德化縣西至縣南為丁溪至南安縣西一十里為金溪過縣南東流至晉江縣治南為晉江

入于海。

漳江 源出汀州連城縣東流經長泰又東南流至漳州府城東北九龍江入之過漳州府東入于海。

汀水 源出汀州府北新樂山與貢水分流至汀州府境而東遂南流經上杭永定武平溪水入之東南流過

汀水 源出汀州府北新樂山與貢水分流至汀州府境而東遂南流經上杭永定武平溪水入之東南流過

饒平、大埔。又南流至潮州。靈河、程江水入之。又南入于海。華水皆東流。至汀水始南流。過以水合丁爲汀也。

甲子門水 自長樂經海豐縣東南入于海。

宋端宗浮海駐于此。

廣江 合左右與灘江、湏水、龍川也。右江源出貴州都勻府西南境。會十二渡水過府城南。爲都勻江。經

獨山州。入廣西南丹州。過慶遠府城北。又東流。至柳州府界。福祿江北來注之。

福祿江源自湖廣靖州。西南流入貴州黎平府西境。爲古州江。東流

至永從縣。東南流合爲福祿江。又東合大崖江爲南江。入廣西柳州界。經融縣。入柳江。

柳江 又東至柳城縣西。融水入之。

融水出柳州府北懷遠縣。至融縣東爲融水。又名漳江。下流與背江。思回江。玉華江。丹江。靈壽

溪水合。歷柳城縣西。入柳江。

又東。至柳州府南。爲柳江。抵柳州府城東南。洛青江東來注之。

洛青江在雒容縣一百二十里。源自桂林府流至縣界。入柳江。南流

經來賓縣東。牂牁江西來注之。經象州至潯州府城北。東流爲黔江。經城東南爲潯江。與左江合。左鬱右

潯。二江合流。至平南縣東南爲襲江。亦名都泥江。至平南縣北。烏江在縣西入之。白馬江在縣東入之。襲

江又東流過藤縣北。爲藤江。又東。繡江入之。

繡江源出廣東高州府。北流經容縣。容江注之。至藤縣東南爲繡江。入于藤江。

藤江又東流。至梧州府城西

與灘江合流。爲桂江。東流至梧州府城南。爲大江。陸川從南來注之。大江又東入廣東肇慶府西封川縣。

東安水從封川界南流來注之。

東安水在廣西梧州府城北四十里。

大江過德慶州南。又東瀧水北流來注之。

瀧水源出猺境。經瀧水縣西南八十里北

流入于

大江。大江經肇慶府城南。又為西江。

即端溪。

又東新江北流來注之。

新江源出新興縣亂山。經府城南六里名新江北流入于大江。

又東綏江南來

注之。

綏江源出梧州府懷集縣懷溪水。合馬寧、化蒙、西廟、宿泊、下期、佛燈、甘洞、桃花、多羅、瀘諸水。自峽中曲繞而下。漫流至廣東四會縣治南為綏江。入于大江。

大江又東至廣州府南海縣西為西江。

北江

濱水。

入之。南流。又合東江。

龍川。

入于南海。

牂牁江

一名烏泥江。

其源有二。俱出程番府。一自金筑司治北為麻線河。至府城西境為七曲江。過廬山。東

經洪番。方番。至為番司南。為大章河。一自上司馬橋治東北流。經小程番。盧番北境。南流。遶府城東。過臥

龍司西。與大章河合。為牂牁江。遶臥龍司治南。又為遶翠江。過羅番大龍司治北。回龍江南流來注之。

回龍

江在金石

番司左。

折遶大龍司。東入廣西泗城州。經慶遠府境。達遷江。來賓縣南。東流。綦迥約千餘里。入于右江。

左江。上流即盤江。又名牂牁江。源出烏撒蠻界。過雲南霑益州。有二源。其一北流曰北盤江。其一南流

曰南盤江。州據二江之間。北盤江自霑益州東北流。入貴州普安州北境。折而東南流。經安南衛城東界。

至永寧州境。與南盤江合。南盤江自霑益州西南流。白石江入之。

白石江在曲靖府城北八里。

經貴州普安州西南境南

流。遶雲南羅平州境之西。下流瀟湘江入之。

瀟湘江源出馬龍州木容箬溪至曲靖府城南爲瀟湘江。

又東流。至貴州永寧州與北盤江合。

盤江經永寧州頂營長官司西四十里。南流入廣西泗城州。歷山林峒。由奉議州城北。經州境爲左江。東流過隆安、武緣。至南寧府城西五十里合江鎮。與龍江合。是爲大江。又東西江水來注之。

西江水在武緣縣西源出明山界。經

本縣南流。入于大江。

大江又東。八尺江注之。

八尺江源出廣東欽州界。北流至南寧府城東南六十里。爲八尺江。入于鬱江。

大江東流入橫州。號爲鬱江。下流清江、武

流江、秋風江、東班江來注之。

清江在橫州東一十五里。源出從化鄉。入于撻江。武流江在橫州東南五十里。源出廣東靈山縣界。至橫州入于撻江。秋風江在永淳縣南一十里。源出靈山縣界。流入鬱江。東班江在永淳縣西

北五里。源出賓州領方縣界。流入鬱江。

又東。寶江來注之。

寶江一名浮江。在貴縣西二里。水來自賓州界。入鬱江。

鬱江又東流。至潯州府城南。又名南江。又東流。

與右江會。

龍江。源出交趾廣源州。合七源州水。歷龍州城南。爲龍江。下思明。明江入之。

明江源出思明府城東南上思州南六十里。十萬山。流至上思州治

西爲上思江。至右萬寨與小江水合。又流遶思明府治南。爲明江。又角硬水在思陵州治南。源出州治南二十里。角硬山。北流出州治前。滄則水合之。流入思明府界。會于明江。明江又北流一百八十里。入龍州龍江。

龍江入太平府界。會

崇善縣水。至羅陽縣。馱排江入之。

馱排江源出太平府永康縣。西流至羅陽縣。入于龍江。

至江州。歸安水入之。

歸安水來自上思州。流經江州。入于龍江。

龍江至南

寧府合江鎮。入于大江。

灘江 源出廣西桂林府海陽山流五里分爲二北爲湘水南爲灘水灘江至靈川縣東北銀江入之

在靈川縣東北東流入于灘江 東南流至桂林府城南陽江入之 陽江源出靈川縣思磨山東流入于灘江 又南合相思江 相思江源出臥石山下唐長壽初築相思埭分水使東西流東流至

桂林府城南五十里合灘江西流合白石水至永福縣入于灘江 灘江又南逕平樂府城南又合荔水 荔水源出柳州界歷脩仁荔浦二縣入于灘江 至梧州府城西入于

廣江

滇水 亦名北江源出大庾嶺流經南雄府城南又名保水始興縣在其東北杜安水西流來合之 杜安水出信豐縣深窖鐵子源至始興縣東北三十八里西流入于滇水 滇水西南流凌江水來合之 凌江水源出順都百丈山下流合昌水至南雄府城西入于滇水 又西合朔水 朔水在始興縣東一百里

源出贛州龍南縣界下流與清化水合 滇水逕韶州府仁化縣治南會滇水入之 會滇水源出仁化鄉南流二百五十里入滇水 又逕韶州府城東黎溪入

之 黎溪在韶州府城東九十里源出始興縣東坑嶺西流入滇水 又南流合武水爲曲江 源出郴州臨武闕逕宜章縣南流入樂昌縣又南流至韶州府城東入于滇水 下流至英德縣西一十

五里兩山對峙夾水號滇陽峽又合翁溪 翁溪源出翁源縣靈池山西南流一百四十里至英德縣入于滇水 滇水逕廣州府湟水合焉 湟水在廣州府連州

城下東注陽山出洗口入于滇水 至南海縣西入于西江

龍川 亦名東江。出贛州安遠縣。南流過龍川。河源至惠州府城。西江注之。西江出惠州府西南流至淡水。揚東抵惠州府城與龍川合。 龍

川又西流過博羅縣界。又西入廣州府界。至番禺縣。增江注之。增江源出陳峒山。東南流合防。水逕增城縣。東分。流東支入牛潭。南支至番禺。入于龍川。 合流

入于廣江。

漢陽江 源出古銅陵縣。在陽春縣境。 北雲浮山下。南流過肇慶府陽春縣。會羅鳳水。博麻水。逕陽江縣廢南

恩州城。通北津港門。入于海。羅鳳水在陽春縣北五十里。其流繁。迤西入漢陽江。博麻水在陽春縣東北三十里。源出射木山。西南流入漢陽江。

鑑江 源發廣東高州府電白縣鑑山。逕高州府城東北。合凌羅二水。東南入于海。二水源俱發廣西北流縣。凌水出扶來山下。羅水出

峨石山下。南流七十里而合。

廉江 即合浦江。源出廣西容縣大容山。南流至廣東廉州府州江口。分爲五江。曰州江、陳屋江、白沙塘江、大橋江、新村江。環流府城西南入于海。

欽江 源發廉州府靈山縣北一十五里洪牙山。過欽州東。乃南入于海。而州西二十里漁洪江。又十里鳳凰江。州東二十里平銀江。州南一百餘里防城江。俱注之。

瓊海潮候 天下之潮皆一日兩汛。惟瓊海之潮半月東流。半月西流。泗之大小隨長短星。不係月之盛衰。

元江 一名禮社江。原自雲南府趙州白崖險江。東南流。逕楚雄府。馬龍江入之。

馬龍江源自蒙化府。入楚雄府。鎮南州西南。逕磅嘉縣東。

又東南入于元江。又東南流。逕元江府城。又東逕臨安府城南。入納樓茶甸界。為祿豐江。逕蒙自縣。為梨花江。東南

注于交趾清水江。入海。

瀾滄江 源出吐蕃嵯和歌旬。南流逕麗江府江蘭州西北。入大理府雲龍州西南。過金齒司城東北。八

十五里。羅琅山。逕蒙化府西南一百三十里。至順寧府城東。又南與樣備江合。

樣備江源自劍川州。逕浪穹縣。過點蒼山。合西洱海。逕大理府趙州

西南境。歷蒙化府。順寧府。混流百里。入于瀾滄江。西洱海即古葉榆河也。自鄧州合。點蒼山之十八川而匯于大理府城東。形如人耳。周三百餘里。下流合于樣備江。

又東南逕景東府南一百餘里。過大侯

州南二百五十里。蠻彌山之麓。入元江府。與元江流繞其城。又南至車里。過交趾。入海。

大盈江 有三源。一出赤土山。流為馬邑河。一出龍嵯山。瀆為小湖。流為高河。一出羅生山。流為羅生場

河。三山皆在騰衝司境。達雲南騰衝司城。自東而北而西。三水合為大盈江。又名大車江。南流入南甸宣撫司。分為小

梁河。大盈江與小梁河並西南流。至于崖司。小梁河為安樂河。而合于大盈江。折流而西一百五十里。為

檳榔江。至北蘇蠻界。注金沙江。入緬甸司。麓川江來注之。同流入海。

麓川江。源出峨昌蠻地七藏甸。逕甸旁高黎共山北渡口。又逕芒市司境。至緬甸司太公城。入大盈江。

潞江。本怒江之訛。源出雍望。逕潞江安撫司。北合平市河。入大盈江。平市河一出甸頭山。一出石甸寨。合流逕施甸西。又南合蒲縵泰澗水。逕新柵山口。下流

江。入潞

跋

先高祖遺獻公以理學文章垂名百有餘年。海內既望海若而尊斗杓矣。翬及星緯、律術、卜筮、象數各家言。無不博綜。如肉貫串。篤老支牀。矻矻著述。自康熙雍正閒。竹浦故里。滄經水火。遺書斷有存者。壬辰秋。奉檄來省。適盧子京甫舉。今水經。匡廬游錄。二帙相畀。則讀鈔堂故物也。寒家無鈔胥。係學子初握管者所錄。字多魚魯。因先取今水經校閱一過。謀梓以行。友人新安鮑君以文好古士也。一見忻然。卽任剞劂。而屬識於後。竊惟地理之學最易承訛襲謬。而水其輿地之脈絡也。流別燦然。雖閒有遷徙。而南條北條之分。或原或委之異。其來踪去跡。固可由今而溯古。亦可沿古以知今。非如郡國建置之名號紛拏。轆轤彼此互岐。而無如講地理者之承訛襲謬。則水亦幾如郡國建置之名號之不可究詰也已。今水經之作。先之以表。次分疏其節目。一切卮言勦說。汰盡不留。承學之士省覽卽得。殆用力寡而於功多者矣。近時德清胡徵士肅明纂禹貢錐指。人多遺議。天台齊侍郎次風述水道提綱。侍郎浙人也。其述浙水卽有誤處。則此書其質的也歟。至此書之緣起。具先高祖自敍中。茲不復贅。乾隆癸巳閏三月上浣日元孫璋謹識。



崑崙河源攷

萬斯同撰

本館叢書集成初編所選借月
山房彙鈔澤古齋重鈔及指海
皆收有此書且同一版本借月
本最先故據以排印

四庫全書提要

崑崙河源考一卷

國朝萬斯同撰。斯同有廟制圖考。已著錄。是書以元篤什言河源崑崙。與史記漢書不合。水經所載。亦有謬誤。因歷引禹貢。禹本紀。爾雅。淮南子。及各史之文。以考證之。考張騫言河源出鹽澤。同馬遷又言河源出于闐。天子案古圖書名河所出山曰崑崙。後來諸書。都無異說。唐書吐谷渾傳。始有李靖望積石山覽觀河源之言。而亦未確有所指。迨至篤什奉命行求。稱得之朵甘思西鄙。潘昂霄等妄爲附會。經傳音譯舛訛。遂以鄂敦塔拉之潛行復見者。指爲河源。以阿木尼瑪勒占木遜山。卽古積石山者。指爲崑崙。元史因而採入地理志中。耳食相沿。混淆益甚。我國家德威遐播。天山兩道。盡入版圖。月竊以西。皆我戶闥。案圖考索。知河有重源。篤什所訪。僅及其伏地再出者。而河水之出葱嶺于闐。注鹽澤。潛行至積石者。則篤什皆未之見。伏讀御批通鑑輯覽。攷辨精詳。河源始確有定論。斯同此書。作於康熙之初。核以今所目驗。亦尙不盡脗合。然其時西域未通。尙未得其實據。而斯同穿穴古書。參稽同異。卽能灼知張騫所說之不誣。而極論潘昂霄等之背馳。稽亂。凡所指陳。俱不甚相遠。亦可謂工於攷證。不汨沒於舊說者矣。錄存其書。益以見睿鑒折衷。超軼萬古也。

崑崙河源考

清 鄞縣萬斯同撰

禹貢織皮崑崙析支渠搜西戎卽斂。

孔安國註織皮毛布有此四國在荒服之外流沙之內羌擊之屬皆就次斂美禹之功及荒遐也馬融云崑崙在臨羌西析支在河關西漢書志朔方郡有渠搜縣武帝紀云北發渠搜是也孔穎達云四國皆衣皮毛故以織皮冠之傳言四國崑崙也析支也渠也搜也四國皆是西域故末以西戎總之鄭元云衣皮之民居此崑崙析支渠搜三山之野皆西戎也王肅云在河關西西域也王肅不言渠搜鄭并渠搜爲一孔傳不明或亦以渠搜爲一通西戎爲四也鄭以崑崙爲山謂別有崑崙之山非河所出者也所以孔意或是地名國號不必爲山也

禹本紀河出崑崙崑崙其高二千五百餘里日月所相避隱爲光明也上有醴泉瑤池言其上至高日在山西則東方暗而成夜四方暗而成夜

山海經西南四百里曰崑崙之邱是實惟帝之下都河水出焉而南流東注於無達赤水出焉而東南流注於汜天之水洋水出焉而西南流注於醜塗之水黑水出焉而西流於大杆是多怪鳥獸

郭璞註下都天帝都邑之在下者。河水出山東北隅。赤水出山東南隅。洋水出山西北隅。黑水亦出山西北隅。無遠汜天醜塗大杆皆山名。吳任臣廣註十洲記云。上有金臺玉闕。天帝君之居治處也。葛優翁傳崑崙一曰元圃。一曰積石瑤房。一曰閼風臺。一曰華蓋。一曰天柱。僊人所居也。洋水按水經注引經作漾水出崑崙西北隅。又許慎呂忱孔安國常璩並以漾水出隴西。則洋水或一名漾水。未可知也。又西三百七十里曰樂游之山。桃水出焉。西流注於稷澤。水西行四百里曰流沙。二百里至於羸母之山。又西三百五十里曰玉山。是西王母所居也。西王母其狀如人。豹尾虎齒而善嘯。蓬髮戴勝。是司天之厲及五殘。又西四百八十里曰軒轅之邱。洵水出焉。南流注於黑水。又西三百里曰積石之山。其下有石門。河水冒以西流。

郭註冒猶覆也。積石山在今金城河門關西南羌中。河水行塞外。東入塞內。吳註按一統志。積石在西寧衛境。廢龍支縣之南。夏允彝禹貢合註云。積石有二河。水經大積石又東北流至小積石。一名唐迷山。土人以鬼爲唐迷。蓋傳其山有鬼神往還也。

愚按郭吳二家之說。以解禹貢之積石則合矣。若解山海經之積石。恐未合也。據經自崑崙至積石皆西行。則積石在崑崙之西。二

千一百里。經言在西。而解者乃在東。毋乃刺謬乎。

按此經所言崑崙。不知在西域何國。據其上文。謂西次三經之首曰崇吾之山。在河之南。西北三百里曰長沙之山。泚水出焉。北流注於泚水。又西北三百七十里曰不周之山。東望泚澤。河水所潛也。其源

潭潭泡泡。又西北四百二十里曰崑崙山。丹水出焉。西流注於稷澤。又西北四百二十里曰鍾山。又西百八十里曰秦器之山。觀水出焉。西流注於流沙。又西三百二十里曰槐江之山。邱時之水出焉。而北流注於泐水。其上多青雉黃。多藏琅玕黃金玉。其陽多丹粟。其陰多采黃金銀。實惟帝之平圃。南望崑崙。其光熊熊。其氣魂魂。西南四百里曰崑崙之邱。自西次三經之首至此皆山海經文。自崇吾至崑崙。凡歷二千四百一十里。其間一千五百一十里。西北行五百里。西行。惟槐江至崑崙四百里。西南行。今雖不知崑崙所在。即以經文考之。中兩言泐水。一言泐澤。泐水即泐澤也。泐澤即鹽澤也。鹽澤即蒲昌海也。去玉門陽關止三百餘里。二關在漢爲燉煌盡境。西出關即是西域。明無燉煌地。以肅州之嘉峪關爲界。二關東距嘉峪。不過八九百里。由是言之。經之所謂崑崙之在玉門西千里之外。與漢武所名之崑崙。當不甚相遠。或者漢之崑崙。即古之崑崙。歷世久遠。人莫能知。漢武以意度之。適與相合耳。

海內崑崙之墟。在西北。帝之下都。崑崙之墟。方八百里。高萬仞。赤水出東南隅。以行其東北。西南流注南海。厭火東。河水出東北隅。以行其北。西南又入渤海。又出海外。即西而北。入禹所導積石山。泐水。黑水。出西北隅。以東東行。又東北南入海。羽民南。弱水。青水。出西南隅。以東又北。又西南過畢方鳥東。

郭註言海內者。明海外復有崑崙山。方八百里。高萬仞。謂其墟基廣輪之高卑耳。自此以上二千五百餘里。止有醴泉華池。去嵩高五萬里。蓋天地之中也。見禹本紀。吳註按王崇慶云。疑其重出。非有二崑

崑崙也。十洲記云。崑崙有三角。正北曰闐風嶺。正西曰元圃臺。正東曰崑崙宮。神異經曰。崑崙有銅柱焉。其高入天。所謂天柱也。蔡沈云。積石在金城郡河關縣西南羌中。古之言河源者不一。元都實謂出火敦腦兒。明僧宗泐親至其地。云出伊卜綽必瑯山。要皆崑崙之異名也。按前一條見本經第二卷。西次三經之內。後一條見第十一卷。海內西經之內。郭註謂有二崑崙。吳註謂其重出。恐謂此書非出一人之手。此卽西山經崑崙。特記者有詳略耳。

西海之南。流沙之濱。赤水之後。黑水之前。有大山名曰崑崙之邱。有神人面虎。身有文。有尾。皆白處之。其下有弱水之淵。環之。其外有炎火之山。投物輒然。有人戴勝。虎齒。有豹尾。穴處。名曰西王母。此山萬物盡有。

郭註。弱水。其水不勝鴻毛。今去扶南東萬里。有耆薄國。東復五千里許。有火山國。其山雖霖雨。火常然。火中有白鼠。時出山邊求食。人捕得之。以毛作布。今之火浣布是也。卽此山之類。河圖玉版亦曰。西王母居崑崙之山。穆天子傳曰。乃紀名迹於弇山之石。曰西王母之山也。然則西王母雖以崑崙爲宮。亦自有離宮別窟遊息之處。不啻住一山也。故記事者各舉所見而言之。吳註化蠻經曰。崑崙山九重。重相去九千里。山有四面。竺乾書曰。阿耨山卽崑崙也。一名須彌。訛呼疏彌。在于闐國西一千三百餘里。其水分流四面去。入中國者爲黃河。注東海。其三面各入南西北海。如弱水黑水之類。十洲記云。崑崙

山弱水周迴繞匝。東南接積石圖。西北接北戶之室。東北臨大活之井。西南至承淵之谷。元中記曰。神邱有火穴。光景照千里。崑崙有弱水。鴻毛不能載。括地圖曰。崑崙之弱水。非乘龍不得至。水經註曰。流沙西行。極崦嵫之山。北山有石。以兩石相打。則水潤。潤盡則火出。山石皆然。炎起數丈。神異經曰。荒外有大山。生不燼之木。胡應麟筆叢曰。經稱西王母豹尾虎齒。當是人類殊別。穆天子傳云。天子賓於西王母。觴於瑤池之上。西王母爲天子謠。天子執白圭元璧。獻錦組百。純組三百。西王母再拜受之。則西王母服食言語。與常人無異。無所爲豹尾虎齒之象。惟司馬相如大人賦有之。蓋據山海經耳。乃山海經則何所據哉。任臣謂西王母黃帝時乘白鹿授地圖。舜時獻白玉琯。穆王時。西王母來賓。不過西方一國。如八百媳婦名耳。若豹尾虎齒。則亦貫胸儻耳之類。又何足怪。後世好事家。以西王母等於麻姑。上元夫人之列。至謂漢武降西王母於七夕。若果有其事者。則文人附會之過也。爾雅觚竹。北戶。西王母。日下。謂之四荒。漢書西域傳。安息長老傳。聞條支有弱水。西王母亦未嘗見也。

按此一條。見山海經第十六卷大荒經內。別一崑崙也。考禹本紀。崑崙高二千五百里。去嵩高五萬里。若海內西經之崑崙。則在于闐國內。于闐去洛陽止一萬一千七百里。見於後漢書。而洛陽去嵩高不遠。安得有五萬里。故禹本紀之崑崙。疑卽大荒經之崑崙。而決非海內西經之崑崙也。

爾雅。河出崑崙虛。色白。所渠并千七百一川。色黃。

淮南子。崑崙之墟。河水出其東北。陬赤水。出其東南。陬洋水。黑水。出其西北。陬凡此四水。帝之神泉。以和百藥。以潤萬物。

水經。崑崙墟在西北。

鄠道元注。三成爲崑崙。說曰。崑崙之山三級。下曰樊桐。一曰板松。二曰元圃。一名閩風。上曰增城。一名天庭。是謂太帝之居。

廣雅云。崑崙墟有三山。閩風、板桐、元圃。淮南子云。縣圃、涼風、樊桐。在崑崙閩圃之中。山上有增城九重。楚辭云。崑崙縣圃。其尻安在。層城九重。其高幾里。嵇康遊僊詩云。結友家板桐。但未聞板松耳。擬或字譌。

去嵩高五萬里。地之中也。

禹本紀與此同。高誘稱。河出崑山。伏流地中。萬三千里。禹導而通之。出積石山。按山海經。自崑崙至積石。一千七百四十里。自積石出隴西郡。至洛。準地。至可五千餘里。又按穆天子傳。天子自崑崙山入於宗周。乃里西土之數。自宗周灋水。以西北。至於河宗之邦。陽紆之山。三千有四百里。自陽紆西至河首。四千里。合四千七百里。外國又云。從大晉國正西七萬里。得崑崙之墟。諸僊居之。數說不同。道阻且長。逕記綿緜。疑當作經。記綿邈。水陸路殊。徑復不同。淺見未聞。非所詳究。不能不聊述聞見。以誌差遠也。

其高萬一千里。

山海經。稱方八百里。高萬仞。郭景純以爲。自上二千五百餘里。淮南子稱高萬一千里。百一十四步二

尺六寸。

河水出其東北陔。屈從其東南。流入於渤海。

山海經曰：崑崙墟在西北。河水出其東北隅。爾雅曰：河出崑崙墟。色白。所渠并千七百一川。色黃。物理

論曰：河色黃者。衆川之流。蓋濁之也。百里一小曲。千里一曲一直矣。漢大司馬張仲議曰：按張仲事出樞

譚新論。而漢 齊溝洫志：講河濁不宜溉田者。乃大司馬長安。張戎字仲功。今稱張仲。疑誤。河水濁。清澄一石水六斗泥。而民競引河溉田。今河不通利。至三

月桃花水至。則河決。以其噎不洩也。禁民勿復引河。是黃河兼濁河之名矣。述征記曰：盟津河津恆濁。

方江爲狹。比淮濟爲闊。寒則冰厚數丈。冰始合。車馬不敢過。要須狐行。云此物善聽。冰下無水。乃過。人

見狐行方渡。余按風俗通云：里語稱狐欲渡河。無如尾何。且狐性善疑。故俗有狐疑之說。亦未必一如

緣生之言也。述征記。郭緣生所撰。

水經河源辨

桑欽水經首敘崑崙。以河源所從出也。其言曰：崑崙墟在西北。去嵩高五萬里。地之中也。其高萬一千
里。河水出東北陔。屈從其東南。流入於渤海。是數言者。吾嘗疑之。山海經言崑崙有三。其一見西次三
經之內。曰崑崙之邱。實惟帝之下都。河水出焉。而不言其道里。其一見海內西經之內。曰海內崑崙之
墟。在西北方八百里。高萬仞。河水出東北隅。此卽西次三經之山。但言有詳略。非二山也。其一見大荒

經曰。西海之南。流沙之濱。赤水之後。黑水之前。有大山名曰崑崙之邱。下有弱水之淵環之。而亦不言道里。惟禹本紀言。崑崙高二千五百餘里。去嵩高五萬里。爲地之中。而淮南子則言高萬一千里。夫三書所言其高不一。欽書旣據山海經。則當言高萬仞。若據禹本紀。則當言高二千五百餘里。乃河水所出。則從山海經。去嵩高五萬里。則從禹本紀。而高萬一千里。又從淮南子。數言之中。自相謬戾。曉人固當如是乎。夫河水所出之崑崙。山海經所云者。在西域于闐國。去長安九千六百七十里。長安去嵩高不過千里。今言去嵩高五萬里。則是大荒之崑崙。非于闐之崑崙也。大荒經明言下有弱水環之。其非河源所出可知。何得言河水出其東北。隴河之源則引海內之崑崙。山之高則引大荒之崑崙。何胸中憤憤如是。豈後人可欺。而事在絕域者。可憑臆而妄道耶。夫欽仕於王莽時。其於武帝之窮河源。及史記之張騫傳。必聞且見矣。何故不從其說。而妄引大荒之崑崙。今大荒經具在。河水何曾出其下哉。此爲水經之第一篇。而謬妄已如此。其他又從可知矣。

又出海外南至積石山下。有石門。河水冒以西南流。

水經積石辨

山海經之言積石有二。一曰又西三百里曰積石之山。其下有石門。河水冒以西流。又西者自崑崙西行二千一百里。方至積石。其水西流。史記所謂于闐之河。水皆西流注西海是也。一曰海內崑崙之墟。

在西北。河水出其東北隅。以行其北。西南入於渤海。又出於海外。卽西而北。入禹所導積石山。史記所謂于闐之東水皆東流注鹽澤。是也。二山東西相距。不知幾千里。不可合而爲一明矣。乃桑欽水經謂崑崙墟在西北。河水出其東北陬。屈從其東南流入於渤海。又出海外南至積石山。下有石門。河水冒以西南流。是合二山而爲一矣。夫河水冒以西流。本指西方之積石。禹本導之積石。山海經曷嘗有是言。欽乃移置於其下。固已大謬矣。更於西流改爲西南流。不知河自鹽澤而下。實皆東流。而非西流。加一南字於水道。終不合。其可以曲解乎。故河水冒以西流之文。言於西方之積石。則可言於東方之積石。必不可。況東方之積石。乃兩山夾峙。河流其閒。非冒也。欽故襲其文。乃全昧其義。是用山海經而反背乎經矣。酈道元之註最善。於此亦不能辨。孰謂此書爲不刊之定論哉。

史記大宛傳。張騫使西域。還爲天子言于闐之西。水皆西流注西海。其東則東流注鹽澤。鹽澤潛行地下。其南則河源出焉。多玉石。河注中國。而樓蘭姑師邑有城郭。臨鹽澤。鹽澤去長安可五千里。其後騫死。漢使窮河源。河源出于闐。其山多玉石采來。天子案古圖書。名河所出山曰崑崙。太史公曰。禹本紀言河出崑崙。崑崙其高二千五百餘里。日月所相避隱爲光明也。其上有醴泉瑤池。今自騫使大夏之後也。窮河源。烏睹本紀所謂崑崙者乎。故言九州山川。禹近之矣。至禹本紀山海經所有怪物。余不敢信之也。漢書西域傳。西域以孝武時始通。本三十六國。其後稍分至五十餘。皆在匈奴之西。烏孫之南。南北有大

山中央有河。東西六千餘里。南北千餘里。東則接漢。隄以玉門陽關。西則限以葱嶺。其南山東出金城與漢南山屬焉。其河有兩源。一出葱嶺山。一出于闐。于闐在南山下。其河北流。與葱嶺河合。東注蒲昌海。蒲昌海一名鹽澤。去玉門陽關三百餘里。廣袤三百里。其水亭居。冬夏不增減。皆以爲潛行地下。南出於積石爲中國河云。

按于闐東去長安九千六百七十里。東北至都護治所三千九百四十七里。都護治烏壘城。去陽關二千七百三十七里。而河源在于闐東境。其去陽關不甚遠。當漢使窮河源時。未置河西四郡。則視于闐爲遙。迨四郡既開。自燉煌列亭障。直至鹽澤。而輪臺渠犂。皆置田卒。設官吏。後又命都護盡護南北道諸國。則于闐亦在節制中。其去河源不遠矣。漢使歲時往來。皆所目擊。其說豈盡誣。乃自都實之說出。而人皆厭舊喜新。羣然起而附和之。反詆漢人語爲妄。何其謬也。況東漢時。班超父子鎮西域。歷數十年。彼於萬里之外。如條枝安息諸國。猶使命往返不絕。豈于闐在三千里之內者。反不經涉其地乎。觀漢書所載河源。視史記爲詳。此必孟堅得之於仲升。故能瞭如指掌。厥後班勇代父撰西域記。以獻范氏。卽用爲西域傳。所言河源。與前二書無異。則其言益可信。豈有司馬班范三代之史。皆不足據。獨都實一人之言。爲足據乎。或曰。史記言張騫使大夏之後。窮河源。烏睹所謂崑崙。則禹本紀山海經之言。不足信矣。曰。河所出之山。本不名崑崙。乃漢武按古圖書。錫以此名。故子長言無崑崙。未嘗言無河源。

也。且漢武所按圖書疑卽山海經何以知之。經所言崑崙去鹽澤不遠。此亦去鹽澤不遠。故疑其非二。況此地之山。惟崑崙最高。寧更有一山與之相匹哉。漢武之錫名崑崙。亦必審覈而後定。夫豈漫然率意加之哉。唐書載李靖追吐谷渾窮寇。次星宿川觀河源。此頗與都實言相類。要不若史漢所志詳駁而可信也。

後漢書郡國志。臨羌縣有崑崙山。

按漢書地理志。金城郡臨羌縣下。註西北有西王母石室。僊海鹽池。西有弱水崑崙山祠。

愚謂此崑崙卽禹貢織皮崑崙之地。故馬融王肅皆謂在臨羌縣西。非漢武所名之崑崙也。後漢書所言河源與漢書悉同。不復載。

晉書張駿傳。酒泉太守馬岌上言。酒泉南山卽崑崙之體。周穆王見西王母。樂而忘歸。卽謂此山。此山有石室。玉堂珠璣。鑲飾煥若神功。宜立西王母祠。以裨朝廷無疆之福。駿從之。

按此崑崙卽漢臨羌之崑崙也。自漢世已有此說。故馬岌因之。而更益以西王母之事。要皆附會之詞。非實事也。漢之酒泉郡。今爲肅州衛。其南有祁連山最高大。今言酒泉南山卽崑崙之體。豈卽以祁連爲崑崙乎。不然。祁連已極高大矣。寧更有一崑崙與之並峙。然則漢志及馬岌所云。其卽祁連山乎。

新唐書吐谷渾傳。吐谷渾居甘松山之陽。洮水之西。西北有流沙數百里。夏有熱風。傷行人。風將發。老駝

引項鳴埋鼻沙中人候之。以氈蔽鼻口。乃無恙。太宗時。其王慕容伏允遣使者入朝。未還。卽寇鄯州。後數入寇。至拘天子行人。遣使曉勅。十反無悛言。貞觀九年。詔李靖爲西海道行軍大總管。侯君集積石道。任城王道宗。鄯善道。李道彥。赤水道。李大亮。且末道。高甑生。鹽澤道。並爲行軍總管。率突厥契苾兵擊之。黨項內屬。及洮州羌。皆殺刺史。歸伏允。夏四月。道宗破伏允於庫山。俘斬四百。伏允謀入磧。疲唐兵。燒野草。故靖馬多饑。道宗曰。柏海近河源。古未有至者。伏允西走。未知其在。方馬糲糧乏。不如按軍鄯州。須馬壯。更圖之。君集曰。不然。向者段志元至鄯州。吐谷渾兵輒附城。彼國方完。逆衆用命也。今虜大敗。斥堠無在。君臣相失。我乘其困。可以得志。柏海雖遠。可鼓而致也。靖曰。善。乃分二軍。靖與大亮辭萬均以一軍趨北。出其右。君集道宗以一軍趨南。出其左。靖將薩孤。吳仁。以輕騎戰曼都山。斬名王。獲五百級。諸將戰牛心堆。赤水源。獲虜將南昌王慕容孝儁。收雜畜數萬。君集道宗登漢哭山。戰烏海。獲名王梁屈葱。靖破天柱王部落於赤海。收雜畜二十萬。大亮俘名王二十。雜畜五萬。至且末之西。伏允走圖倫磧。將託於于闐。萬均督驍騎追亡數百里。又破之。士乏水。刺馬飲血。君集道宗行空荒二千里。盛夏降霜。乏水草。士糜冰。馬秣雪。閱月。次星宿川。達柏海上。望積石山。覽觀河源。執失思力馳破虜車重。兩軍會於大非山。破邏貞谷。初伏允子順。質隋爲金紫光祿大夫。伏允立其弟爲太子。順歸怏怏。至是自以失位。欲立功以結天子。乃斬天柱王。舉國降。伏允懼。引千餘騎遁磧中。衆稍亡。從者纔百騎。窮無聊。卽自經死。國人立順爲君。稱臣。

內附。詔封西平郡王。

新唐書吐蕃傳。穆宗長慶元年。吐蕃遣使請盟。詔以大理卿劉元鼎爲盟會使。右司郎中劉師老副之。命宰相與僕射韓臯等十人。與吐蕃使者論納羅。盟京師西郊。明年。請定疆域。元鼎與論納羅就盟其國。既盟。元鼎踰湟水至龍泉谷。西北望殺狐川。哥舒翰故壁。多在湟水。至濠谷。抵龍泉。與河合。河之上流。由洪濟梁西南行二千里。水益狹。春可涉。秋夏乃勝舟。其南三百里。三山。中高而四下。曰紫山。直大羊同國。古所謂崑崙者也。虜曰悶磨黎山。東距長安五千里。河源其間。水澄緩下。稍合衆流。色赤。行益遠。他水并注。則濁。故世舉謂西戎地曰河湟。河源東北直莫賀延磧尾。殆五百里。磧廣五十里。北自沙州西南入吐谷渾。寢狹。故號磧尾。隱測其地。蓋劍南之西。元鼎所經見大略如此。

書唐書吐谷渾傳後

按河源之出星宿海。衆謂始於都實之所窮。不知新唐書已明載之。當唐師之征吐谷渾。追亡逐北。其時至倥偬也。乃望積石山。覽觀河源。此必前人原有是說。故因經行而一觀之。不然何以知其爲河源。而從容駐師以眺望之哉。李道宗曰。柏海近河源。古未有至者。則唐人之知河源久矣。師經其地。卽數萬大軍所具見。則內地之人無不知河源在星宿海矣。特當時以追窮寇。未暇由源竟委爾。元都實之入朶甘思。必蕃人相傳。謂河源在其地。故直由吐蕃以入。而於漢世舊傳之鹽澤。竟不一問。迨既見星宿海。遂謂河

源在是。自矜爲千古所獨見。而不知唐書已載之。固不待元世而始得其迹也。然都實無足怪。獨怪朱思本、潘昂霄、柯九思輩。號爲通人。乃亦動色相驚。謂發千古之祕。豈新唐書亦未之見耶。觀元史河源考。謂朱思本得帝師所藏梵字圖書爲之志。夫帝師者。烏斯藏僧也。元重西僧。其人輻輳於都邑。則前所云番人相傳有是說者。當不誣矣。豈都實始發其祕哉。

書唐書吐蕃傳後

新唐書吐谷渾傳言大軍次星宿川。達柏海上。望積石山。覽觀河源。是河源在星宿川矣。其吐蕃傳言大理卿劉元鼎爲吐蕃盟會使。旣盟。西觀河源。其地有三山。中高而四下。曰紫山。古所謂崑崙也。番曰穆穆哩山。東距長安五千里。河源其間。是有兩河源也。元都實往究。亦謂源出星宿海。與吐谷渾傳合矣。又謂東北去九股河八九日程。九股河去崑崙二十日程。是河源之去崑崙幾三千里。與元鼎所言迥不符。非吐蕃之紫山明矣。乃文謂朶甘思東北有大雪山。名伊拉瑪博囉。其山最高。譯言騰格哩哈達。卽崑崙也。夫一山而有三名。番人亦不稱爲崑崙。都實安知其爲崑崙而稱之。此其爲附會之言無疑也。及明洪武初。僧宗泐使西域。云河出伊卜綽必瑠山。夫一河源而元鼎謂出紫山。又曰穆穆哩山。宗泐則曰伊卜綽必瑠山。都實則曰大雪山。曰伊拉瑪博囉。曰騰格哩哈達。一山而有數名。吾將安從。總而論之。不特都實之言爲附會。卽元鼎之言未始非附會也。惟元鼎謂崑崙去長安五千里。以都實所經道里計之。約略相

似。但山名終古不易。中國之稱崑崙。自漢至今無異也。則番語亦應然。況元鼎所使者吐蕃。都實所探者亦吐蕃。何以唐曰紫山。而元曰大雪山。唐之番語曰穆穆哩。而元之番語曰伊拉瑪博囉乎。知其非一處明矣。夫同一窮河源也。漢不同於唐。唐又不同於元。究安所取信。吾謂河出崑崙。古書盡然。山海經及漢人所窮得之矣。後人既知古書河出崑崙之語。乃不求之於閩。而反求之於吐蕃。偶見衆流會聚之區。卽指爲聚源。而強名其旁近之山曰崑崙。以牽合乎古書。不知欲求真而愈失其真也。論古者尙深辨之哉。

元史河源考

河源古無所見。禹貢導河。始自積石。漢使張騫持節到西域。度玉門。見二水交流。發蔥嶺。趨于閩。匯鹽澤。伏流千里。至積石而再出。唐薛元鼎使吐蕃。訪河源。得之於悶磨黎山。然皆歷歲月。涉艱難。而其所不得。過如此。世之論河源者。又皆推本二家。其說怪迂。總其實。皆非本真。意者漢唐之時。外夷未盡臣服。而道未盡通。故其所往。每迂迴艱阻。不能直抵其處。而究其極也。元有天下。薄海內外。人迹所及。皆置驛傳。使驛往來。如行國中。至元十七年。命都實爲招討使。佩金虎符。往求河源。都實既受命。是歲至河州。州之東六十里。至寧河驛。驛西南六十里有山。曰殺馬關。林麓穹隘。舉足浸高。行一日至巔。西去愈高。四閱月。始抵河源。是冬還報。并圖其城傳位置以聞。其後翰林學士潘昂霄。從都實之地庫庫楚。得其說。撰爲河源

志臨川朱思本又從巴爾濟蘇家得帝師所藏梵字圖書而以華文譯之與昂霄所志互有詳略今取二
家之書考定其說有不同者附注於下按河源在吐蕃朵甘思西鄙有泉百餘泓沮洳散渙弗可逼視方
可七八十里履高山下瞰燦若列星以故名鄂端諾爾鄂端譯言星宿也

思本曰河源在中州西南直四川馬湖蠻部之正西三千餘里雲南麗江宜撫之西北一千五百餘里帝師撒思加地之南二千餘里水從地湧出如井其井百餘東北流百餘里匯為大澤曰鄂端諾爾羣流奔湊近五七里匯二巨澤名鄂楞諾爾

自西而東連屬吞噬行一日迤邐東驚成川號赤賓河又二三日水西南來名伊爾齊與齊必勒河合又

三四日水南來名呼蘭又水東南來名伊拉齊合流入齊必勒其流浸大始名黃河然水猶清人可涉

思本曰呼蘭河源出自南山其地大山峻嶺綿互千里水流五百餘里注也里出河也里出河亦出自南山西北流五百餘里始與黃河合 又一二日歧為八九股名伊遜鄂羅木譯

言九渡通廣六七里可渡馬又四五日水渾濁土人抱革囊騎過之聚落糾木幹象舟傅髦革以濟僅容

兩人自是兩山峽束廣可一里二里或半里其深叵測朶甘思東北有大雪山名伊拉瑪博囉其山最高

譯言騰乞里塔即崑崙也山腹至頂皆雪冬夏不消土人言遠年成冰時六月見之自八九股水至崑崙

行二十日思本曰自渾水東北流二百餘里與和羅海圖河合 嚙里火禿河源自南山水北偏西流八百餘里與黃河

餘里又折而東流過崑崙山下番名伊拉瑪博囉其山高峻非常山麓綿互五百餘里河隨山足東流薩斯嘉克吉克特也 河行崑崙南半日又四五日至地名克吉及克

特二地相屬又三日地名哈喇伯勒齊爾四達之衝也多寇盜有官兵鎮之近北二日河水過之

思本曰河過克特與伊實巴沁河合亦西入思今河源有轍豹 崑崙以西人簡少多處山南山皆不穹峻水亦散漫獸有髦牛野馬

讀之北正北流凡五百餘里而與黃河合

狼狽獬羊之類。其東山益高地亦漸下。岸狹隘。有狐可一躍而越之處。行五六日。有水西南來。名納琳哈喇。譯言細黃河也。

思本曰。吟喇河。白狗嶺之北。水西北流五百餘里。與黃河合。又兩日。水南來。名奇爾穆蘇。二水合流入河。喇河與黃河合。

正北流二百餘里。過阿以伯站。折而西北流。細崑崙之北二百餘里。與奇爾穆蘇河合。奇爾穆蘇河源自威茂州之西。北岷山之北。水北流。即古富州境。正北流四百餘里。折而西北流。又五百里。與黃河合。河水北行。

轉西流。過崑崙崙北。一向東北流。約行半月。至貴德州。地名必齊勒。始有州治。官府州隸吐蕃等處宣慰司。

司治河州。又四五日至積石州。即禹貢積石。五日至河州安鄉關。一日至打羅坑。東北行。一日。洮河水南

來入河。思本曰。自奇爾穆蘇河與黃河合。又西北流與彭磋河合。彭磋河源自彭磋山之西北。水正西流七百餘里。過北色達實地。與黃河合。折而西北流。三百餘里。又折而東北。過西寧州貴德州馬嶺。凡八百餘里。與邈水合。

邈水源自清磨宿軍谷。正東流。五百餘里。過三巴站。與黃河合。又東北流。過土橋站。古積石州來羌城廓州搆米站界都城。凡五百餘里。過河州與野龍河合。野龍河源自西傾山之北。水東北流。凡五百餘里。與黃河合。又東北流一百餘里。過達白城銀州站。與湟水合。湟水源自祁連山下。正東流。一千餘里。注浩靈河。其浩靈河源自刪丹州之南。刪丹山下。水東南流七百餘里。注湟水。然後與黃河合。又東北一百餘里。與洮河合。洮河源自楊色嶺北。東北流。

過臨洮府。凡八百餘里。與黃河合。又一日。至蘭州。過北下渡。至鳴沙河。過應吉里州。正東行。至寧夏府。東南行。即東勝州。

隸大同路。自發源至漢地。南北澗溪。細流旁貫。莫知紀極。山皆草石。至積石。方林木暢茂。世言河九折。彼

地有二折。蓋奇爾穆蘇及奎騰必齊勒也。思本曰。自洮水與黃河合。又東北流過達達地。各八百餘里。過豐州西

餘里。折而正南。流過大同路雲內州東勝州與黑河合。黑河源自漁陽嶺之南。水正西流。凡四百餘里。與黃河合。又正南流。過保德州葭州及興州境。又過臨州。凡一千餘里。與察納河合。察納河源自古宥州東南流。過陝西會德州。凡七

百餘里。與黃河合。又南流三百里。與延安河合。延安河源自陝西葭州關亂山中。南流三百餘里。過延安府。折而正東

流。三百里。與黃河合。又南流三百里。與汾河合。汾河源自河東朔州之南。亂山中。西南流。過營州冀寧路汾州。靈州。

晉寧路絳州。又西流至龍門。凡一千二百餘里。始與黃河合。又南流二百里。過河中府。過潼關。與太華大山綿互。水

勢不可待南。乃折而東流。大磜河源東北流。所歷皆西番地。至蘭州。凡四千五百餘里。始入中國。又東北流。過達達地。

凡二千五百餘里。始入河東境內。又南流至河中。凡一千八百餘里。週計九千餘里。

河源志

延祐乙卯春。聖天子以四海萬國之廣。軫念庶民艱虞。罔控告也。分使諸外郡諸道。布揚德威。戚休興替。之清汙揚激之。幾旬密邇。獨不得均其澤。越五月。詔前翰林學士承旨庫庫楚。翰林侍讀臣昂霄。奉使宣撫京畿西道。臣昂霄承命。驚悸罔措。惟務罄竭忠赤。盡心民瘼。而後已。庫庫公一日語昂霄曰。余嘗從余兄榮祿公都實抵西國。窮河源。聞之不覺瞿然以駭。有是乎哉。請畢其語。公曰。世祖皇帝至元十七年。歲在庚辰。欽承聖諭。黃河之入中國。夏后氏導之。始自積石。粵漢唐所不能悉其源。今爲吾地。朕欲極其源之所出。營一城。俾番賈互市。規置航傳。凡物貢水行達京師。古無有也。朕爲之以永後來無窮利益。難其人都實汝舊人。且習讀國語。往圖汝諸。授招討使。佩金虎符以行。是歲至河州。州東六十里。有寧河驛。驛西南五六十里。山曰捉殺馬關。林麓穹隘。譯言塔斯達巴。啓足寢高。一日程至嶺。西邁愈高。四閱月。約四五千里。始抵河源。冬還。圖城傳位置以聞。上悅。往營之。授吐蕃等處都元帥。佩金虎符。置寮案。督工。工師悉資內地。造航爲艘六十。城傳措土物完。庫庫楚驛聞。適相哥征昆哥臧不迴。力沮遂止。翼歲。兄都實旋都。河源在吐蕃朶甘思西鄙。有泉百餘泓。或泉或潦水。沮洳散渙。方可七八十里。且泥淖溺。不勝人跡。過觀弗克旁。復高山下。眎燦若列星。以故名鄂端諾爾。鄂端譯言星宿也。羣流奔湊。近五七里。匯二巨澤。名

鄂楞諾爾自西徂東連屬吞噬廣輪馬行一日程迤邐東驚成川號齊必勒河二三日程水西南來合流入齊必勒其流浸大始名黃河然水清人可涉又一二日歧裂八九名也孫幹譯言九度通廣六七里馬亦可度又四五日程水澤濁土人抱革囊乘騎過之民聚落糾木幹象舟傅毛革以濟僅容兩人繼是兩山峽東廣可一里二里或半里深叵測矣朶甘思東北鄙有大雪山名伊拉瑪博囉其山最高譯言騰乞里塔卽崑崙也山腹至頂皆雪冬夏不消土人言遠年成冰時六月見之自八九股水至崑崙行二十日程河行崑崙南半日程地又四五日程至地名克吉及克特二地相屬又三日程地名哈喇伯勒齊爾四達之衝也多寇盜有官兵鎮防崑崙迤西人簡少多處山南山皆不穹峻水亦散漫獸有髦牛野馬狼狗獬羊之類其東山益高地亦漸下岸狹隘有狼可一躍過之者行五六日程有水西南來名納琳哈喇譯言細黃河也又兩日程水南來名奇爾穆蘇二水合流入河河北行轉西至崑崙北二日程他水過之北流少東又北流約行半月程至貴德州地名必齊勒始有州治官府州隸河州置司吐蕃等處宣慰司所轄又四五日程至積石州卽禹貢積石五日程至河州安鄉關一日程至打羅坑東北行一日程洮河水南來入河又一日程至蘭州其下過北度至鳴沙州過應吉利州正東行至寧夏府東南行卽東勝州隸西京大同路地面自發源至漢南地澗溪細流旁貫莫知紀極山皆草石至積石方林木暢茂世言河九折彼地有二折蓋奇爾穆蘇及貴德州必齊勒也漢張騫使絕域羈連拘執艱危百罹凡歷大宛月氏數

國其旁大國五六皆稱傳聞以爲窮河源烏能覩所謂河源哉史稱河有兩源一出于閩一出葱嶺于閩水北流合葱嶺河注蒲類海不流洑至臨洮出焉今洑水自南來非蒲類明矣詢知土人言于閩葱嶺水其下流散之沙磧又有言河與天河通尋源得織女支機石以歸亦妄也崑崙去嵩高五萬里閩風元圃及積石瑤華蓋僊人所居又何也唐史吐蕃傳河上流由洪濟梁南二千里水益狹春可涉秋夏乃勝舟其南三百里三山中高而四下曰紫山古所謂崑崙其言頗類然上稱河源其間云國家揚天威互天所覆燾無間海內外冠帶萬國罔非臣妾視漢唐爲不足訝故窮河源去萬里若步閩閩嘻盛典也不可志因志之都實族女眞富察氏統烏斯藏路暨招討都元帥凡三至吐蕃庫庫楚今除甘肅行省參知政事

河源志序

河源有志自本朝始前乎此曷爲未有志河源者道路遼阻所傳聞異辭莫能究河之源也山經曰孰薨之水西流注於泐澤出於崑崙之東北陔實惟河源而水經載河出崑崙經十餘國乃至泐澤山經又稱陽紆之山河出其中穆天子傳亦云陽紆之山曰河北馮夷所居是惟河宗氏釋氏西域志稱阿緄達大山上有大淵水卽崑崙山也地理志亦稱崑崙山在臨羌西而漢書載河出兩源或稱有或稱無河源所著異同況世殊代易名地亦異終莫能有究之者我太祖皇帝二十有一年春正月征西夏夏取甘肅等

城。秋取西涼府。遂過沙陀至黃河九渡。按崑崙當九渡下流。則崑崙固已歸我職方氏矣。憲宗皇帝二年。命皇太弟實喇。帥諸部軍征西域。凡六年。關封疆四萬里。於是河源及所注枝出者。盡在封域之內。當時在行有能記其說。皆得於目擊。非妄也。逮世祖皇帝功成治定。天下殷富。遂命臣都實置郡河源。故翰林侍讀學士潘公得究其詳實。搜源析派。而作斯志。乃知由崑崙崙崙行一月。始窮河源。於戲。當四海混一之盛。聞廣見覈。致數千載莫能究者。俾後世有考而傳信焉。豈斯文之光。實邦家無疆之休也。元統元年。奎章閣博士柯九思序。

明太祖實錄。鄧愈傳。洪武十年。吐蕃所部川藏。邀殺烏斯藏使者。詔愈爲征西將軍往討之。愈偕副將沐英等。分爲三道。擣其巢穴。敗川藏之衆。追至崑崙崙山。斬首不可勝紀。獲馬牛羊十餘萬。

宣宗實錄。洪熙元年八月。陝西都指揮李英討安定曲先寇。敗之。以捷聞。初。永樂末。朝廷遣中官喬來喜。鄧成等使西域。道經安定曲先之地。番寇五千餘人。邀劫之。殺來喜成。掠所費賜物。仁宗皇帝臨御。命英與必里克土官指揮康壽等討之。英等率西寧諸衛。及隆本國師密薩爾嘉勒藏等十二番族之兵。至罕東。問故罕東衛指揮綽爾嘉言。此安定衛指揮哈克薩。蘇蘇克。及庫森衛指揮散失思所爲。英等遂進兵。寇驚走。官軍追擊。踰崑崙崙山。西行數百里。至雅爾科之地。與安定寇黨銷南等戰。收之。斬首四百八十餘級。生擒七十餘人。獲駝馬牛羊十四萬有奇。庫森賊聞風遠遁。英欲窮追。以道險遠引還。至是以聞。英以

功封會倡伯。

大明一統志。崑崙山在朶甘衛東北。伊拉瑪博囉山極高峻。雪至夏不消。綿亙五百餘里。黃河經其南。黃河在朶甘衛西鄙。直馬湖蠻部正西三千餘里。去雲南麗江府西北一千五百里。肅鎮志。崑崙山在城西南二百五十里。山嶺峻極。彷彿崑崙。故云。經夏積雪不消。世呼雪山。涼張駿時。酒泉太守馬岌言。周穆王見西王母於此。宜立王母祠。駿從之。崑崙山本在西域朶甘思。番名伊拉瑪博囉山。

僧宗泐望河源詩。積雪覆崇岡。冬夏常一色。羣峯讓獨雄。神君所棲宅。傳聞嶰谷篁。造律諧金石。草木尙不生。竹產疑非的。漢使窮河源。要領殊未得。遂令西戎子。千古笑中國。老客此經過。望之長嘆息。立馬北風寒。回首孤雲白。

河源出自茂必爾徹伯爾山。番人呼黃河爲茂處。鼈牛河爲必力處。赤巴者。分界也。其山西南所出之水。則流入鼈牛河。東北之水。是爲河源。予西還宿山中。嘗飲其水。番人戲稱謂曰。漢人今飲漢水矣。其源東抵崑崙。可七八百里。所涉處尙三百餘里。下與崑崙之水合流。中國相傳以爲源自崑崙。非也。崑崙名茂伊布拉克。其山最高大。四時常雪。有神居之。番書載其境內祭祀之山有九。此其一也。并記之。洪武十一年。太祖以佛書有遺逸。命僧宗泐率其徒三十人往西域求之。遍歷直八里別利迦竹諸國。至十五年。得莊嚴寶王文殊等經以還。

河源辨

王子道經汜水。故人邀遊大伾之上。俯見河流。客有問河源者。王子曰。是非予所履也。雖然。予以爲必出於崑崙。曰。子何以知之。曰。予蓋以理知之。山與水同原。天下之山起於崑崙。天下之水起於崑崙無疑也。曰。子不聞乎。昔元世祖欲窮河源。遣使行四五千里。至吐蕃。采甘思西部。有曰鄂端諾爾者。華言星宿海也。有水百泓。望之如列星。此河源也。踰崑崙一十餘日矣。予曰。西域之跡。發自張騫。所歷諸國。甚久且遠。東漢之世。大秦條支安息。至於海濱四萬里外。重譯貢獻。班超遣掾甘英窮臨西海而還。皆未覩所謂崑崙也。何元使得之之易乎。禹本紀言。河出崑崙。去嵩高五萬里。外國圖云。從大晉西七萬里。得崑崙之墟。今元使行不及五千里。云已踰之。何崑崙之近乎。自昔言崑崙者。皆在西北。元使所圖。乃在西南。何也。然則元使所謂崑崙者。果崑崙乎。所謂星宿海者。果河源乎。未可知也。爾雅云。河出崑崙墟。色白。并千七百川。色黃。山海經云。崑崙之邱。河水出焉。而南流。東注於無達。赤水出焉。東南流注於汜天之水。洋水出焉。西南流注於醜塗之水。黑水出焉。西流注於大杆。淮南子曰。崑崙之墟。河水出其東北。阪。赤水出其東南。阪。洋水出其西北。阪。雪山高五百里。由旬。山頂有阿耨達池。池東有恆伽河。從象口出。共五百河。流入東海。南有新穎河。從牛口出。共五百河。流入南海。西有博文河。從馬口出。共五百河。流入西海。北有斯隄河。從獅子口出。共五百河。流入北海。康泰扶南傳曰。恆水之源出崑崙。有五大源。方流爲諸水。洛書曰。河自

崑崙出於重野。逕積石。爲中國之河。張騫云。于闐之西。水皆西流。注南海。其東。水皆東流。注鹽澤。潛行地下。其南。則河源出焉。古書所紀。先後一轍。豈皆不可信。而元使獨可信乎。曰。爲其得之親見也。曰。古之諸人。夫獨非親見。鑿空以欺後世乎。釋氏生於天竺。穆王宴於瑤池。夫豈非見乎。而疑之也。然則元使其誣乎。曰。吾嘗考之。河有兩源。一出于闐。一出崑崙之墟。且漢使亦嘗窮河源矣。謂出于闐。其山多玉石。采來獻。天子案古圖書。名其山爲崑崙。然非古所謂崑崙也。元使所見。其殆是乎。若崑崙之墟。彼固未之覩也。且天竺諸國。有身熱頭痛之坂。縣度之阨。熱風夏雪。毒龍惡鬼。猛虎獅子之害。元使亦嘗歷此乎。禹本紀言河出崑崙。其高二千五百餘里。日月所相避隱。爲光明也。其上有醴泉瑤池。淮南子載崑崙之上有木禾珠樹玉樹。元圃閼風十洲記。謂弱水繞之。上有金臺玉闕之類。元使亦嘗覩此乎。雖其神怪恍惚。不可盡信。而河源之出。於是不可誣也。近有佛圖調。謂鍾山西六百里外。有大崑崙。又有小崑崙。然則崑崙果非一乎。崑崙之遠近不一。然則河源惡乎定。曰。水經云。崑崙在西北。河水出其東北。阪東南流入渤海。其源出于闐之南山。北流與葱嶺水合。東注蒲昌海。郭璞云。河出崑崙。潛行地下。至于闐國。復分流歧出。合而東注鹽澤。復行積石。爲中國河。此定論也。予見近世之論河源者。每以一夫之目。輒廢千古之論。故爲之辨。

按范氏漢書志郡國云。臨羌有崑崙山。班固漢書志地理。其金城郡臨羌縣下。疏云。西北有西王母石室。僂海鹽池。西有弱水崑崙山祠。至唐而吐蕃傳云。崑崙山在其國中。長慶劉元鼎使吐蕃。稱三山中高四下曰紫山。古所謂崑崙。亦曰穆穆哩山。潘昂霄黃河志云。朶甘思東北鄰有雪山。卽崑崙。明洪武三年。西平侯沐英九年。征西將軍鄧愈追羌人至此山。咸云。崑崙是昉於涼張駿時。馬岌傳會之言也。馬岌爲涼酒泉太守。上言酒泉南山卽崑崙。周穆王見西王母。謂此山宜立西王母祠。以裨朝廷無疆之福。駿從之。西王母旣祠。厥後范氏遂以崑崙載之臨羌。而疏班固地理志者。亦約范書張大之。酒泉之南山。非臨洮之西北乎。然禹本紀云。河出崑崙。崑崙其高二千五百餘里。日月相避隱爲光明也。其上有醴泉華池。去蒿高五萬里。地之中也。龍魚河圖云。崑崙山。天中柱也。水經云。崑崙墟在西北。去蒿高五萬里。河水出東北。陬淮南子云。高萬一千里有奇。上有木禾珠樹沙棠琅玕在其東。絳樹在其南。碧樹在其北。佛圖西域志云。阿耨達大山。其上有大淵水。卽崑崙山。康泰扶南傳云。天竺恆水之源。乃極西北出崑崙山。穆天子傳云。天子自崑崙山入於宗周。里西土之數。自宗周灑水以西至於崑崙。則瑤池上萬有一千一百里。酈道元注水經。按是數說。參以山海經。謂里至互殊。難以詳究。蓋考之山海經。而不悟崑崙有海內大荒之別也。山海經之海內西經云。海內崑崙之墟。在西北帝之下都。方八百里。高萬仞。百神之所在。河水出其東北隅。入禹所導積石山。郭璞注云。言海外復有崑崙山。又山海經之大荒西經云。西海之南。流沙之濱。

赤水之後。黑水之前。有大山名曰崑崙之邱。其下有弱水之淵。環之。其外有炎火之山。有人戴勝虎齒。有豹尾。穴處。名曰西王母。是有二崑崙焉。蓋穆天子所登。山海經所謂海內之崑崙。班固西域傳所載。南北有大山。中央有河。東西六千餘里。南北千里。東則接漢。隄以玉門陽關。西則限以葱嶺。計其里至。度其在所。是介葱嶺于闐之間矣。葱嶺以西爲天竺國。又西有大崑崙。是爲天柱。是爲地中。山海經所謂大荒之崑崙。西域志所謂阿耨達大山。禹本紀水經所謂去蒿高五萬里。水經所謂河水出其東北。阪屈從其東南。流入于闐。是其重源也。張騫尋河源。至于闐葱嶺。以爲河源。而司馬遷遂有烏覩崑崙之論。不信夫禹本紀山海經之載。又言九州山川。尙書近之。獨不覩尙書亦有織皮崑崙析支渠搜之紀乎。又水經載河水由葱嶺逕西域十三國而注泐澤。班固西域傳云。河有葱嶺于闐兩源。合而東注蒲昌海。一名鹽澤。卽泐澤也。去玉門陽關三百餘里。廣袤三百里。其水冬夏不增減。潛行地中。南出積石山。爲中國河。范氏云。西域內屬諸國。自玉門陽關西至葱嶺六千餘里。其紀河源同符漢。自燉煌西至鹽澤。列起亭障。戊己校尉屯於車師。都護之府置於烏壘。介西域之中。督察動靜。是葱嶺于闐之流。入於蒲昌。漢之官卒。目所經見。班固記之。諒非綿邈計度之辭。水經所載十三國。鄯道元亦引固書入證。往往脗合。是非誕妄。至云鹽澤之水。洄湍電轉。爲隱淪之脈。當其環流。飛禽上經。無不墜之。是卽河水所潛出於積石。亦豈臆造。由漢以來。彰彰較著。嗣後唐咸亨元年。薛仁貴征吐蕃。敗績大非川。二年。乃以河關靜邊鎮置積石軍。久之遂

說河關兩山夾峙。河出其中者。爲禹貢所導之積石。矧又輔以馬崃。西王母之詞。范氏臨羌之記。崑崙既在河關之上。益爲積石明證矣。水經云。河水南至積石山下。有石門。河水昌以西南流。酈道元謂之重源。東方朔十洲記云。崑崙南接崑崙圍。實崑崙之支輔。與水經南至積石山之文合。山海經云。積石之山。其下有石門。河水冒以西流。萬物無不有。郭璞注云。山在金城河關縣西南羌中。後漢書云。段熲爲護羌校尉。追燒當羌。且鬪且行。割肉餐雪。四十餘日。遂至河首積石山。出塞二千餘里。隋置河源郡。積石鎮。命劉權鎮之。統遠化赤水二縣。在古赤水城。又在曼頭城。西宇文述追破吐谷渾處。所謂得地東西四千里。南北二千里。置郡縣鎮成。徙天下輕罪居之者也。注云。有積石山。河水所出。又有烏海。貞觀中。詔李靖。侯君集等。西征吐谷渾。軍次鄯州。始議所向。後戰於曼都山。窮追出塞。登漢哭山。復戰於烏海。破天柱部於赤海。君集道宗行空荒之地二千里。乃次星宿川。達柏海上。望積石山。觀河源。自是以上。曷嘗言積石在河關也。唐置軍而更名積石。借其嘉稱。猶之征吐谷渾。近在青海。而以君集等爲積石道。鄯善道。赤水道。且未道。鹽澤道也。豈實隸其地耶。置河源軍於鄯城縣。非河源郡之故地。蓋可證也。逮至開元中。張守節作史記正義云。河州有小積石山。河源出大崑崙。入鹽澤。東南潛行。入吐谷渾界。大積石山。又東北流。至小積石山。皆河源所出者。爲大崑崙。似以臨羌山爲小崑崙矣。又以河源關爲小積石山。吐谷渾界者。爲大積石。其名迹未盡溷也。肅代之季。吐蕃據有河湟。中外隔越。旣易五朝。歷數十年。邈無經載。長慶中。劉元

鼎使吐蕃胡怪乎以關爲積石。紫山爲崑崙。以積石冒出之流星宿川爲河源也。而杜佑之通典。歐陽元之漢記。馬端臨之通考。以至鄧展都實。潘昂霄輩。不悟置軍名所由起。寢假相延。遂堅執元鼎之說。極詆山海水經以及班固郭璞酈道元之僞。嗚呼。曲士拘儒。經見不廣。及乎知識未逮者。輒爲荒唐。誠諺所謂少所見多所怪。妄鼓筆札。而令前人之與古蹟。受誣千載。直如長夜。至於昂霄之志。一行奉爲指南。而明朝按河關者。建立禹廟。祀在有司。積石之訛。益莫可辨。崑崙之墟。終古不移。深可慨惜矣。客有難余者曰。尙書崑崙析支。差次序之。所在相去似不應遙。范氏稱金城之西南濱於析支。則臨羌之有崑崙。獨不可以理推之。而乃信不可知之載牒。以置辨乎。余曰。不然。水經云。河自朔方東轉。逕渠搜北。蓋渠搜在今榆林北。析支渠搜亦差次敘之。相去大遠。又析支卽河曲羌所居。蓋都實所稱九渡水。是以又稱由九渡至崑崙。行二十六日程。河始行崑崙南。經敘崑崙在析支之上。又豈應山在析支下哉。蒲昌之水。潛出積石。既有經證於漢。而崑崙流入葱嶺。獨無是理乎。矧尙書亦稱導沈水。東流爲濟。溢爲滎。東出於陶邱。沈水亦旣潛而復見。尙書亦詭誕矣。余賦黃河。悉陳羣籍。究其源委。會通其故。乃備列之。以發千百年之覆云。

崑崙辨

古之論河源者。皆謂出於崑崙。而傳記所載。不一其地。古人亦未有定論。或不諳道里之遠近。而狃爲一說。或就其耳目之見聞。而倡爲異辭。總由山川不能自名。又越在窮荒絕域。無地志可憑。里人可質。且言

語不通。稱名亦異。以故歷數千百年而終不得其實也。吾爲博考古書。其言崑崙者。約有十餘家。其在禹貢。則言織皮崑崙析支渠搜西戎卽敍。孔安國釋爲四國。馬融王肅因之。皆謂崑崙在臨羌西。獨鄭元釋之爲山。而又不言其所在。此一崑崙也。其在禹本紀。則言崑崙高二千五百里。去嵩高五萬里。居天地之中。司馬遷史記述之而頗譏其非。此又一崑崙也。山海經志崑崙凡三。其在西次三經。則曰崑崙之邱。實爲帝之下都。河水出焉。而南流東注於無達。其在海內西經。則曰海內崑崙之墟。在西北方八百里。高萬仞。河水出東北隅。本止一山。而兩言之者。蓋此經非出於一人。故所載有詳略。而實非二山也。此又一崑崙也。其在大荒經。則曰西海之南。流沙之濱。赤水之後。黑水之前。有大山名曰崑崙之邱。其下有弱水環之。此又一崑崙也。爾雅謂河出崑崙墟。色白。并千七百川。色黃。淮南子謂崑崙之墟。河水出其東北。阪。此卽襲山海經之說。無二山也。其在史記。則謂于闐之西。水皆西流注西海。東則東流注鹽澤。鹽澤潛行地下。其南則河源出焉。鹽澤去長安可五千里。天子乃案古圖書。名河所出山曰崑崙云。則是山本無名。特漢武加以此名爾。此又一崑崙也。孟堅蔚宗二書同史記。其在晉書。則謂涼張駿時。酒泉太守馬岌言。酒泉南山卽崑崙之體。周穆王宴西王母於此。請建祠以祀西王母。駿從之。此又一崑崙也。在新唐書。則謂河之上流。由洪濟梁西南行二千里。水益狹。春可涉。秋夏乃勝舟。其南行三百里。三山中高而四下。曰紫山。古所謂崑崙也。番曰穆穆哩山。東距長安五千里。河源出其間。此又一崑崙也。其在元史。則謂河源在

吐蕃朶甘思西部有泉百餘泓。名鄂端諾爾。華言星宿海也。行幾一月。朶甘思東北有大雪山。名伊拉瑪。博囉。其山最高。譯言騰格哩哈達。卽崑崙。此又一崙崙也。明太祖實錄。則謂鄧愈沐英討吐蕃。追至崑崙山。宣宗實錄。則謂李英追安定。曲先賊踰崑崙山。西行數百里。至雅令闊之地。此又一崑崙也。夫崑崙一也。而有十數家之異。將安所適從哉。愚細考之。禹貢之崑崙。近在漢唐邊塞之內。晉馬岌之所指。明鄧愈沐英李英之所踰。及肅鎮志之所載。卽此山也。此非河源之所出。可不必辨。禹本紀之崑崙。遠在數萬里之外。華人從無至者。郭璞注大荒經。卽引此爲說。是二書所指。本同一山。況明言弱水環之。則非河源所出。可知。亦不必辨。山海經之崑崙。不言在西域何國。以上文考之。其東北四百里曰槐江之山。邱時之水出焉。北流注於泐水。泐水卽泐澤也。泐澤卽鹽澤也。鹽澤去陽關止三百里。則崑崙當亦不遠。漢武之所據。與山海經所云地實相近。漢武所案圖書。當卽用此經之文。不然。崑崙旣巍峙於鹽澤西矣。豈更有一大山與之並峙乎。知兩書之所指。非二崑崙也。若夫唐書之崑崙。漢語旣曰紫山。番語又曰穆穆哩。何以知其爲崑崙而稱之。劉元鼎雖身履其地。不過因古書河出崑崙之言。從而附會之。非其實也。元史之崑崙。謂去河源三千里。夫天下之水。未有不發源於山者。黃河爲天下大川之首。豈有不源於山而源於星宿海之理。且華夷之語。皆不名崑崙。而都實獨意之曰。此崑崙也。其誰信之。夫欲窮其源。自當溯流而上。乃不由水道。反從山巔西行。此何意乎。自漢以來。皆言河出于闐。爲都實者。當先求漢之河源。審知其非。

是然後求之他方。庶幾無憾。今不問兩漢之故蹟。舍于闐而問之吐蕃。自以爲河源在是。又誰信之。夫河源不出於崑崙。已背乎古人之說。而其所謂崑崙。又去于闐之崑崙數千里。其不可渾而爲一也明矣。然則究安從。惟山海經漢武帝之說。吾有取焉。餘則無取也。竊怪昔人之論崑崙者。不考諸書之異同。而并爲一說。致東西背馳。南北督亂。說愈多而愈不明。余故盡集諸書之言。崑崙言河源者爲一編。而辨異同如此。

崑崙辨二

余既爲崑崙辨。或詰之曰。山海經所言多怪妄。子獨有取焉。何也。曰。此經載人物形貌。世所不經見。詆爲怪妄固宜。然皆在荒服之外。其餘中夏固未嘗有是也。至所載山川。不可謂盡謬。其所言崑崙去鹽澤不遠。東距今肅州之嘉峪關。不過二三百里。其爲方止八百里。高止萬仞。今中國之山多有若是者。可謂之荒誕乎。世之稱王西母者。謂其居瓊室瑤臺。非人間可望。乃經謂其狀如人。虎齒豹尾。蓬髮戴勝。穴居。世謂崑崙多寶玉。而經一無所言。惟槐江之山云多琅玕金寶。可盡謂之荒誕乎。至漢武所名之崑崙。始則張騫言之。已特命使者窮之。其言無異。故武帝案古圖書。名之曰崑崙。其後設戊己校尉。西域都護。于闐亦在所轄中。則鹽澤蒲昌之間。乃漢使歲歲往來之地。非人跡不到者比。班范二史。豈有不核其實而漫然載之者乎。況范史之西域傳。卽班勇之西域志。班氏父子鎮西域者數十年。而後爲此志。其書詎不可

信乎。若星宿海之說。唐書吐谷渾傳載之。原不始乎都實。但唐書止言次星宿川。達柏海上。望積石山。覽觀河源。而不言崑崙。則其所言河源。未必其河源也。都實則直云河源出星宿海。距崑崙二三千。其下流赤賓河。始名黃河。然其水猶清。人可涉。則知其上流非黃河矣。非黃河而強名之爲河源。蓋因唐書有星宿川之說。遂附會之以欺其主爾。蒙古主旣未嘗詳覈。而學士大夫如潘昂霄、柯九思、朱思本輩。爭相稱頌。駭爲異聞。獨不知新唐書已載之於其前乎。余之於山海經、史記。特取其近理而可信耳。豈故以詆排都實之說哉。

書徐霞客傳後

余嘗偶讀徐霞客傳。謂霞客好遊。嘗徒步窮河源。由雞足而西。出玉門關數千里。至崑崙山窮星宿海。去中夏三萬四千三百里。又曰。禹貢岷山導江。乃泛濫中國之始。非江河源。河發崑崙之北。江發崑崙之南。非河源長而江源短也。觀者駭其說。以爲信然。余細考之。而知其言之謬也。元都實之說。謂河源在朶甘思之星宿海。夫朶甘思雖番地。去雲南麗江西北。止一千五百里。去四川馬湖正西。亦止三千里。霞客豈不知河源出星宿海。旣至雞足山。自當由麗江而往。不半月即可達其地。乃舍此不由。反遠走玉門關。何也。玉門東距肅州之嘉峪關約九百里。嘉峪南至麗江約五千里。朶甘思去玉門則六七千里矣。不走千五百里之近。而走六七千里之遙。必非人情。意者以漢武所名之崑崙。卽都實所指之崑崙乎。夫漢之崑

崑崙在于闐東。去玉門不過千里。去肅州不過二千里。元之崑崙在朶甘思東北。去星宿海三千里。去漢崑崙可四五千里。其相距如是之遙。而霞客乃渾而一之。其不學無識一至此乎。若霞客有是言。則霞客爲無知。若霞客無是言。而此傳言之。則知其胸中亦太不辨涇渭矣。蓋漢崑崙之旁。絕無星宿海。元崑崙之旁。去星宿海又遠甚。其語無一合。今乃不能駁正。反爲作傳以張大之一何愚也。且自玉門至漢崑崙。安得有數千里。自星宿海至中夏。安得有三萬四千里。此庸人能辨之。而學者乃爲所惑。吾不能解也。其言江河之源。並出於崑崙。亦非也。若漢之崑崙。止有河源而無江源。若元之崑崙。並非河源所出。安得有江源。其中國之大川。江河爲最。河在北。江在南。劃然分流。河既在北。其源必發於北。故謂河源在于闐之崑崙者是也。江既在南。其源必出於南。謂發於漢之崑崙。則偏於北而非南。謂發於元之崑崙。則元之黃河在其南而不在其北。其說怪妄不經。或者未睹前史。不識崑崙有二。故縱口言之。謂世人無能覆按也。詎知前史昭然。有不可得而掩匿者哉。予懼霞客之傳之惑人也。故爲之辨。

